

168  
4  
6

瓊臺會稿

終 十 六 十 二

史記  
瓊臺會稿  
賊所評

瓊臺會稿卷之十

瓊山丘文莊公濬著

神道碑

命都御史恭惠楊公神道碑銘

加藤家

正統己巳 車駕北狩胡虜乘機犯我畿甸時廣東左叅議楊公坐事居京邸 朝廷用言者起公守白羊口是歲廣東都司

囚越獄有司不能捕遂至嘯聚守土者閉門自守召邊將禦之至則為所敗報至 京師廣入士寓京者聯名上章乞公

朝命授公都察院左僉都御史乘傳往至則廣城被困者數月矣城中軍民囁嚅然朝不謀夕見公至始有更進之望徙民之居鄉客者避能起城至則閉門不納及歸盡為賊所許



者日益衆公下令有司用木爲牌給民從其出入又榜外  
遣官招撫之於是歸附者日以千萬計賊勢日孤公偵知其有  
嚮順意遣使往諭之賊首黃肖養曰吾輩得楊大人一言死不  
恨矣尅期來見賊果至公毅然欲往潘臬以下皆沮其行曰賊  
意叵測柰何公曰吾以誠待之毋慮也公出見賊羅拜泣下公  
諭以禍福且示以更生之路賊衆以大魚獻公受之不疑遂謹  
謀而去期以再會未幾董都督統大軍至賊遂中變歲庚午三  
月五日有大星墜于城外對岸之河南十二日質明都指揮姚  
麟者來白事公出與之語姚既出公忽病作扶入卧榻卽呼其  
子玠曰我死矣不能終始王事知我者其天乎語訖瞑目而逝  
城中居民聞公卒信疑相半既得實爭走哭館下雖老嫗稚子

亦至失聲滿城縞素具牌位哭奠者相屬陷在賊中者聞之亦  
曰楊公死吾屬終無生理矣訃聞天子悼惜遣官諭祭如禮  
公卒後僅閱月大軍卽平賊凡賊所經之處盡屠之民受刑者  
輒仰天號曰使楊大人在吾人豈受此禍哉既而耆老黎善聚  
等赴京乞立公祠從之事下爲忌者所沮忌者既去有司始立  
公祠于廣州府城隍廟之旁水旱疾疫必禱焉民有事訟于官  
不得其平者輒具詞焚于祠下廣人至今過其門者輒舉手加  
敬嗚呼古所謂生爲豪傑死爲神明者公非其人耶公諱誠字  
信民以字行紹興之新昌人也少遊鄉泮領永樂庚子浙江鄉  
薦宣德庚戌由上舍選爲行在工科給事中丁內艱起復改刑  
科正統癸亥吏部尚書王文端公薦佐廣藩陞辭受旨許以言

事公既抵任時按察使郭智奉

勅整飭兵務事多自專公

首疏其不法事郭遂去任而黃翰來代之黃所爲益甚公復上  
疏發其奸詞連僉事黃廣廣亦誣詆公俱逮下獄公就逮廣人  
爭携金帛就舟相贖公一無所受而黃舟則爭以瓦石擲之既  
至法司鞠得實黃坐除名凡奏公他事皆涉虛惟鹿鳴宴簪銀  
花一事行勘尋白廣之軍民狀公德政相率赴三司保留亦有  
跋涉萬里直詣闕庭者前後以數千計及公在白羊既受命  
遷城官軍不忍其去亦赴官保留之公之所至得人心如此公  
宅心仁厚見人有患難不啻在己汲汲然爲之惟恐後惟疾惡  
太甚見人有不平事輒扼腕爭辯用是見嫉於人方在學校時  
見儕類有過舉者輒切切不置及有當爲事衆方推避卽奮先

爲之人多以矯激目之久之見其事事皆然亦皆帖服葬母時  
倩夫舁塚石每夫公代其舁數百步人遍乃止或曰何自苦如  
此公曰葬吾母而專役他人於心安乎家居時聞鄉鄰兄弟有  
不睦或構訟者輒至其家勸之不從明日復至人雖拒絕之不  
厭也必從而後已邑有朝妃渡每歲爲暴漲所阻公率衆督工  
堰石爲步至今行者過之必曰楊給事中力也官禁近時嘗一  
奉勅整點江西軍伍所至求民瘼除宿弊事竣回條上所詢  
民情五事皆當時急務及佐廣藩善政在人者尤多方是時承  
平日久禁網踈闊嶺海之間民物殷富仕者類以黷貨殃民爲  
常事上下交征恬不爲恥公至一以廉潔爲心而凡事行之以  
寬公退之暇卽出公署門徐步街衢間詢問父老以民間利病

反覆欵曲必得其情而後已嘗有民以公事至長藩者欲致諸  
獄公曰彼無罪姑遣之去至期自來可也長曰彼無保任者公  
曰僕保之民感公恩信縱之去至期皆自來公為政所以感人  
心者大抵此類也嗚呼今世之為政者豈復有如公者哉公卒  
後二十年是為成化己丑 朝議凡大臣有功德在人者皆加  
謚贈賜公謚曰恭惠又七年公之鄉人王溢者仕為昌邑教諭  
始介其鄉人禮部侍郎俞公欽僉都御史丁公川屬予紀其行  
事將鏡于石溢少嘗受業于公念公平生志節不下古人特以  
居官清白身後無贏餘至今墓石未立恐遂泯於世也以予出  
嶺南知公事為詳特以見屬謹按狀新昌楊出漢太尉之後世  
居其邑之彩煙山曾祖 祖 皆不仕父文吉以公貴贈給事  
中毋丁氏封孺人公生洪武庚午 月 日享年六十有一歸  
葬於本縣上王山之原配石氏封孺人子男四玟瑄玘愛玘以  
公蔭錄為國子生任桃源縣丞女一適張棐予也於公嘗有一  
面之雅而於鄉邦之受惠也亦未嘗不與焉矧以紀事為職業  
無溢之請恒欲書公之績以傳於世况重以溢之請乎既紀其  
實復系以銘銘曰

楊公烈烈持立揭揭惡彼沓沓不茹不吐何懾何懼靡追靡  
拒介而能通拘而有容隨而不逢生為正人仕為直臣死為  
明神愛而畏之思而企之廟而祀之德則有矣名則久矣死  
則不朽矣

成化十  
二年

浙江按察司副使陶公神道碑

天下承平日久變起倉卒智者不及謀勇者不及禦有能奮身其間以爲民蔽繼之以死卒能作吏民之氣以收遏絕之效其功顧豈小哉當宣德正統之盛大江以南民不識兵也久矣歲戊辰劔寇起于閩既而括寇相挺以起猝然竊發如風盛火猛延燎于枯草燥荻之場無有障蔽限隔之者當是時郡縣密邇于寇者其民蓋岌岌然矣一時官吏罔知所措往往驚畏走避雖以朝命將領亦皆觀望以爲進退無有立一定之計決必然之策者而浙江按察副使陶公者獨能以身嬰賊鋒而死之嗚呼豈非毅然大丈夫哉公始以易經中廣西鄉試第四人以親老愿仕遠方得交趾某縣典史改鳳山縣時黃忠宣公兼掌藩臬司事知公有學行俾掌諒江府教授事秩滿陞按察司檢校丁內艱起復改山東憲司未幾按察使虞公信以有守有爲堪任風憲薦公起至京師試如所舉擢大理寺右寺評事尋用戶部尚書劉中敷薦超拜浙江按察司僉事會倭寇犯邊公以計殲之

朝廷有綺段寶鈔之賜至是寇起處州將薄金華衆議曰蘭溪乃賊所從出之路蘭溪不守則兩浙震動矣陶僉憲有謀畧非得之以遏其衝賊不易弭也公至蘭溪首率民壯因故城址立木柵晝夜警備又於縣南五十里立山口蘇村太岩諸寨以扼其要害屢用計略擒賊黨數百人聲震遠近賊不敢犯境百姓爲之歌曰僉憲陶君賊聞震驚始爲民患今則逃生由是一邑晏然而鄰境亦恃以無恐時總兵官都督徐恭尚書石璞等屯

師日久賊深入險阻乘間時出官軍訶知又復遠遁撫捕之計皆莫知所施會議遣藩臬臣僚一人抵賊巢招諭之莫敢行者公毅然請任其事至則感之以誠諭之以理賊首葉宗留陳諫胡等環聽竦動咸翻然悔悟率其黨出降

朝廷嘉公績陞本司按察副使仍守金華賊黨陶得二者尤號桀黠嘗僞以名降總戎諸公授以冠帶俾招其黨得二殺使者不受招官軍莫能制公以計用賊之來降者殺得二黨前後共數百人生擒百餘人而來降者又三千人得二僅餘四十人深遁山谷中其勢日孤指日可就擒矣同事者有忌公成功而沮抑之者公計未得行賊勢復起公與都指揮崔源往武義謀所以備禦之者至甫數日賊至矣武義無城惟木爲柵時兵民無

幾而賊勢張甚或勸公稍却以避其鋒者公嚙齒厲聲以諭衆誓不與此賊俱生既而賊近城公麾兵極力與戰自邗至申俄而城中火起蓋賊有潛入城爲內應者衆回望見火起遂大潰公竟死之時景泰元年五月十七日也公時年六十有一兩浙人聞知如喪其親戚諸郡縣皆遣人致奠蘭溪民相率言于憲司塑公像立屋祠之又各出已田以爲經久計事聞

朝廷遣官諭祭 誥贈公浙江布政司右叅政官其子魯新會

縣丞公諱成字孔思梧之鬱林州人也曾祖諱某祖諱某父諱某母鍾氏公五歲而孤與兄祖弟源極相友愛娶某氏繼某氏生子二人長即魯次然曾以公卒之某年某月歸葬鬱林之某原厥後都御史崑山葉公盛巡撫兩廣復以鄉人意立屋祠公

於鬱城如蘭溪云魯累官廣東按察司僉事以公墓道之碑未  
立徵文於予予惟自南方有事以來死事之臣爲 國家所旌  
褒者僅四人其三人者予皆有所紀述獨於公缺焉矧四人中  
公與二人者皆出吾嶺南予叨官太史表忠義以翼世教其職  
也重以僉憲公之請何辭以辭嗚呼風霜別草木之性禍患顯  
忠臣之節自古死封疆之臣多見於季世國攘之秋而此數公  
者獨能於四方無事之時一遇倉卒之變以身試之使徂安父  
參之士夫知所感發興起事功以救生民之禍成安集之功而  
公於衆人中又獨爲之帥先其功蓋莫大焉是宜表著之以爲  
世勸所謂三人者未豐知縣鄧公顓死于閩寇慶遠同知葉公  
禎廣東雷副毛公吉二人皆死于廣寇顓與禎皆廣東人吉則

浙人也其死義與公同於法得牽聯書銘曰

死國之臣多在末季公獨死義于承平世奮其一身爲民屏  
蔽我衆雖有匪怯則脆一聞風聲晝掉夜悸鼓不能起不待  
金退四無救援百莫可恃所恃區區曰忠與義公惟一身以  
死自誓食君之祿豈無他輩所以全身亦豈無計公之此心  
則不在是受人之祿則死其事身雖漸盡心則孔熾以我之  
死作彼之氣彼弄兵者獨非人類亦或因之輩心易志天理  
民彝於是乎至往古來今孰能有歲爲臣死忠於天無愧  
帝誥以褒民廟以祀芳名流傳百千萬禩史臣作銘昭告來  
裔

墓誌銘



太子少保禮部尚書謚文安周公墓誌銘

蜀中自古多文學經術之士入國朝以來以政事顯者固多有之而以文學名世者殆不多見今餘百年始得一人焉既居顯位有文名而又深於經術曰太子少保禮部尚書謚文安周公公諱洪謨字堯弼叙之長寧人也曾祖世祥本縣學訓導祖本原河間縣學訓導考永隆長陽縣學訓導三世儒官而祖考俱贈禮部尚書祖妣俱贈夫人公生弱甚甫三日適有異人見之曰此兒質雖弱而神甚全異日當成遠器公長而短小精悍貌雖不揚而精神健固自幼有志一時蜀中士子專攻舉子業公獨有志古學年二十五領四川解首明年廷試第二人蜀進士及第自公始初授編脩景泰中陞左春坊左贊善仍兼舊

職未幾陞侍講又明年南京翰林院缺署事者進公南京翰林院侍讀任署院事成化初召脩

英廟實錄仍舊本院侍讀通前任滿考進秩侍讀學士尋陞南京國子監祭酒丁內艱守制會北監缺祭酒吏部累舉數人者皆不愜

上意有戶部缺以待公公起復至乃以命公近世儒臣未有並主教兩京者有之始自公世以為榮再尋陞禮部右侍郎仍掌監事甫閱月即補禮部缺又四年轉左踰半載適禮部尚書張文質以憂去進公本部尚書三年考滿得加贈二代俄有旨加太子少保

今上即位公以年至乞休致章凡再上不允或有言及公者遂

命公致仕乘傳以行賜寶鈔爲道費公歸家居僅二年卒時弘治辛亥二月二十二日也享年七十有二訃聞遣官諭祭者四命有司營葬事賜諡曰文安公配王氏咸寧教諭錡之女累封至夫人子男二長汝端鄉貢士次汝靖邑庠生女三人長適李鯤次劉武臣二人皆鄉貢士又次適任琛孫男一志汝端等將以某年某月某日葬公于某山之原公初入翰林以館閣無政事專以討論考校爲職一意古學朝退卽入中秘檢所未見書以資見聞而又以爲學必見于用尤留心世務爲編脩時卽上疏條陳十二事繼是歷官兩京以至爲學士凡有所見卽封章具聞前後毋慮數十宣德正統以來館閣諸公上章疏未有多踰公者其在南京太學承安成吳先生寬厚之後事多

廢弛公振作之士氣爲之一倡及北來掌教適有士子納馬入監例科貢士與之爭撥歷先後屢行奏擾公處之各得其宜異論始息在禮部者十有二年當承平之時國家典禮時舉四夷朝貢不絕親王冠婚公王下嫁妃嬪喪祭之類其儀注禮節皆公掌行禮成賞賚歲無虛月皇上在東宮行徵聘禮自永樂以來無前比也公與內閣大臣參酌古今定制行之

憲宗祔廟

祖宗有當祔者會大臣議議雖衆出而主之者公也遂爲定制先是大臣三品以上子孫得廕叙爲太學生後當道者沮之其例遂格公曰

聖學書卷之九  
九  
祖宗定制著諸司職掌廢叙大臣子孫一品至三品皆有官非  
止一大學生也吾幸為禮官吾之子先已得叙為監生而不為  
衆申明可乎同列或難之以為無所因公遂以職名自咨本部  
具疏以聞得請復舊制六部章奏舊無此比也時論以為難他  
如奏加孔子樂舞為八佾以珠飾璣象以復古制止月食不食  
為不當賀給烏思藏印信勘合以為入貢證據減日本人進奉  
刀劍價直其所建明如此類者多著為令公自列官館閣已屬  
意天下事然性方直且真率自任不設城府與人言竭盡衷底  
不復察觀其辭色人率以迂目之晚年建請意欲有所激發振  
拔遂為人所指目賴

天子明聖察公樸忠置之不問觀其致仕臨行

恩賜及身後卹典意可見矣公生于道學大明之後世方以五  
經四書取士而主濂洛之說士子勦成說為文辭以應主司之  
求於其微言疑義不復致詰公繙閱之餘偶有所得輒為闡明  
剖析其間卓然自得者於聖經賢傳亦有裨益積久得二百四  
事粹以成帙名疑辨錄在禮部時以獻于朝意欲綴於各經  
書本註下以梓行也公恒對人言吾為此錄發經書之蘊正先  
儒之失破千載之惑雖三公之尊黃閣之榮吾不與易也公為  
文章專主乎理不尚辭華信筆所書文從理順而不為奇詭鉤  
棘之語滔滔千百言不窘也其為人心地坦夷待物不為猜阻  
人或有論之者亦不之疑外若寬縱中有定見主執一定人雖  
喋喋言之不聽也居家孝友事母太夫人先意承志得其歡心

待弟洪範曲盡友愛族屬貧者厚恤之或爲之嫁娶公少篤學非有急務手不釋卷所著疑辨錄外又有南臯子集二十卷菁齋集五十卷初公西歸蜀時西洛耿公好問爲之代故事僚友必以文贈行公以予知已必欲得予言耿公乃以見屬予既最公平生志行之大者以爲公贈又謂古人著述多在晚年公宜及時成一家之言補先儒之缺垂後世之訓以望于公蓋公專門尚書學恒不滿於蔡傳屢舉以語予予嘗勸公著以爲書公曰俟予休致閑卽成之予曰人命脩短不可必事當爲卽爲必俟閑恐無日也公卽毅然奮發歸語同僚宜與徐公南昌謝公曰丘先生言最是俟新春卽下手也既而以部事繁劇竟不得如志致事命下喜曰吾志遂矣舟還次南京時值盛夏川江不可上乃寓新河樓居日具紙筆將畢夙志爲風所射行至荊州得病至家力疾草安中國禦四夷策凡十事遣人齎以進大抵皆平素所嘗言及曾經進者也明年疾少間謂所親曰吾習尚書蔡氏傳以之取科第自幼讀之覺其有未滿意處恒欲訂證之而無暇今幸得暇矣不及此時成之恐無及也乃草定凡例若干條疾作投筆端坐而逝臨終遺囑必得予文志其墓時子汝靖在京師示公未易簣前所作寄予書予少公一歲方有目肯在告痛謝絕求文者汝靖以治命來請不得已而勉書此以慰吾老友于九泉銘曰

明興百年多文學士士專一經惟用作義雷同勦說誰復致疑侃侃周公實惟經師剖析精微擿抉疎漏死者復生亦不

子咎學既宗經文必根理矧居顯位不徒言已人皆迂公孰知  
所存無待而興卓爾不羣山川歛神草木回色庸蜀英靈歸茲  
玄宅

明故都察院左副都御史盛公墓誌銘

英廟復辟之初權臣之冒功者朋比為奸鑿空起邊釁欲樹奇  
功以蓋其迹率師闖塞即還虜因乘之而入十三道御史欲有  
言同事有洩之者彼先入愬于

上誣御史中有與被繫內臣張永同族者欲為之報復以激

上怒即逮所誣御史下獄明日眾御史章始上

上御便殿召眾入盛氣待之擲章付御史誦之誦不至

上曰止摘章中所條事折之令其分疏復諭之以終誦

上意稍悟然重違權臣意姑從輕典凡列名者俱調外任其一  
人錫山盛公也時掌河南道事出知保定之東鹿縣先是權臣  
啓邊釁其勢焰可畏人無敢言者公首與同官涑水張公鵬謀  
謂事干軍國某等官臺憲烏可畏禍不言張公以為然即入謀  
之兵科都給事中王鉉約以章交上機事因之而失時聯官者  
皆未知也亟召入永平周公質倉卒誦所上章音吐洪亮略無  
阻滯及對

上之言詞有理正天下聞而壯之而不知首啓其謀者盛公也  
同日出補外者若干人其後惟盛公年最高官最顯而能以令  
德終嗚呼天於忠直之報固獨厚之邪公諱顥字時望常之無  
錫人正統辛酉以尚書蔡氏傳得儁京闈在太學十年所交皆

海內知名士景泰辛未始登進士第首擢河南道監察御史尋以老成掌道事時初經己巳之變 朝廷懲前政委靡之失稍開言路一時言事者毛舉細故攻訐陰私以張直聲公獨顧大體惜人才掩其疵疾不爲己甚善類賴之嘗兩奉命出按治按淮時值歲大歉發倉賑貧全活者甚衆按閩時適當大比拔賢振滯是科得人爲盛及是首謀摧折巨奸直聲凜凜聞天下其知東鹿也邑多顯宦往往怙勢爲不法聞公至相戒曰是嘗劾奏石總兵者其人不可犯也公變搏擊以爲撫循吏畏而民安之未幾丁內艱去民留之不可俟其服闋相率詣 闕乞公公得再任不復用刑法有爭訟者諭之以理輒叩首聽受不復辯鄰邑聞之訟多年不決者各來請判于公公折以片言各心服

而去時人有清如水明如鏡之謠邑介真保間四境之民雖非所治亦聞風趨赴郊外有荒落地自然聚以成市邑人因目爲清官店既去任民築亭爲立去思碑請文士爲作記至今存焉歲甲申擢守邵武行所無事不動聲色而郡民大化既而巡撫都憲以延平民狡而事繁請于 朝移公治之延平與邵境聞公政聲有素莫不革心向化巡按御史錄公兩郡政績請旌異于 朝進公一階封贈父母及妻歲癸巳陞廣西叅政專督糧餉丙申陞雲南右布政使丁外艱服闋改陝西尋遷左時廣西殘破之餘公委曲區處民夷賴以不擾陝西地臨三邊公在任日邊報無虛月適歲多歉公調度有方而餽餉不缺入爲刑部右侍郎佐其長以明刑恒舉歐陽公求生不得則死無憾之語

為寮屬告有深文巧詆者輒為白之刑用是平僅再閱歲調公  
南京蓋當道者之非人有欲得公處者或以為言公曰吾南人  
往官于南固其所也明年山東旱饑盜賊將乘之而起 廷議  
速遣大臣巡撫僉曰無如盛時望者改公都察院左副都御史  
乘驛往命至公即日就道甫下車露禱于天雨即大注枯槁復  
蘇公多方設法凡前人救荒之政於今有益者次第舉行而又  
因時之宜條數十策行下所司民賴以濟賑恤之餘所儲尚百  
餘萬又有餘力以及於前代聖賢有功於齊魯者為之建祠宇  
以報祀之公山東之政大抵以黜貪暴表忠良除苛政以固民  
心為本在山東者三年齊俗翕然以變年近七十以老疾上章  
乞致仕

上以其情詞懇切從之馳驛歸至徐州適所部有大獄以公知  
其始末有 旨命鞠之獄成後歸公自家食時家事一以付其  
弟願至是抵家伯仲怡怡友愛加篤公家事一不問願為之構  
方塘書院壘山鑿池蒔花植竹以為娛老之地公時靜坐一室  
焚香讀書以自適泊如也歲丁未以上

皇太后徽號恩進公一階家居者六閱寒暑以歲壬子正月二  
十六日卒享年七十有五訃聞 賜葬祭如例卜以是年十月  
二十四日葬于惠山之原弟願命其子虞持狀來京師求予銘  
按狀盛氏常州右族世多聞人曾大父諱茂之大父諱子實父  
諱文珪俱以公貴贈都察院左副都御史祖妣吳氏妣馬氏俱  
贈淑人公凡三娶殷氏贈淑人顧贈恭人何封淑人子男二唐

義官龍廕補國子生女三王洛強朴吳玉其壻也孫男二欽釗女四曾孫女一銘曰

公為循吏仁中有義公為憲臣義中有仁公撫邦國變荒為熟公佐邦刑於死求生最其功業所在烈烈曰鉅而艱摧折大奸因銘及之補史之遺

明故中順大夫都察院左僉都御史邢公墓誌銘

都察院左僉都御史致仕邢公以成化十七年五月甲午卒于其家有司以聞

皇上命禮部備牲儀翰林譔文遣官諭祭之其子頊以予與公交莫逆求予文志其墓先是公無恙時以書畀鄉人林徽抵予豫以銘文為託得書未幾而公遽捐館舍公長子五歲予幸後

死安敢負公託耶乃按淚序而銘之序曰公諱宥字克寬其先由汴徙瓊之文昌其七世祖章煥仕元為縣尹曾祖某祖世賢父文廣封文林郎監察御史母許氏高安知縣成祚之女贈孺人公以永樂丙申生自幼聰敏稍長補邑庠弟子員甚有時名臨汀曾先生蘭分教邑中於諸生中獨加器重同里溪西林氏為邑中宦族異其不凡以女妻焉歲辛酉領鄉薦戊辰登二甲進士第觀政刑部已巳擢四川道監察御史明年改元景泰太監王振敗籍其家有告其家人孫太安匿其財者公與錦衣衛官于信者鞠之無實于必欲沒入之且曰不然禍立至公曰無其情而文致於法是我殺之也竟辯白被誣者二十人又明年邊事方興儲峙不給是年適當有司朝覲建議者請免來朝官



被劾之罪俾運通州見儲糧四十萬石實宣府命公督運公措  
置有方不盈月邊儲悉足是冬出巡福建先是巡按御史許仕  
達與鎮守尚書薛希璉交惡事聞因命公代仕達且覈其事公  
至一斷以公無所回互時沙寇甫平或言延平衛軍多其親黨  
欲以鎮東衛互易之章下會議薛尚書力主之公獨曰山海異  
習輕動或生他患卒得不動巡海官獲犯禁入海者十數人請  
于朝以梟首示衆而寃號之聲震地公獨疑其非真盜請緩  
之未幾果得真爲盜者亂後增築永安等四城民力有不堪者  
公奏留八郡之匠赴役工部者協助之城得以取成甲戌出按  
遼東時都御史寇深巡撫其地副將焦禮有克敵功寇上其功  
狀乃先於主將曹義事下覆之寇爲曹私囑公不從遂與成隙

戊寅巡按河南奏革舊驛由黃河出潁上以達南京者數十所  
民便之得代還京時寇入總內臺憾公在遼東時事多方擗庶  
之無所得及公秩滿需選銓曹適知縣甄鐸有故勘人命獄有  
言忠國公石亨納其賂縱之者命下勘之衆畏勢無敢往者寇  
以公奏名委覈其實蓋欲假是以中傷公也公審覈名當訖莫  
能害之庚辰陞知台州府台俗健訟公治之一惟緣情據理民  
自信服居台四年兩以巡按時事就逮台民爭持金帛出數百  
里外贖之公一無所受又有耆民數十人赴京告留然公竟坐  
是降職爲晉江縣知縣任未三月會赦復職改知蘇州蘇之田  
賦甲天下丁役雜辦視他郡蓋倍蓰焉而俗尚澆浮公治之一  
本情理不出苛不立苛惟省徭均賦節浮費以便民爲主不期

月政化孚洽歌頌之聲播聞遠近公性不樂華靡且厭浙西俗尚過侈凡百有為務從素簡神祠惟消潔其在祀興者廨宇惟脩葺其切于用者成化丙戌江南大水而蘇尤甚公發官儲及勸富民得米八十餘萬石賑之然猶不繼飢民百十持券入富室借之不與卽強奪公卽帖示俾飢民指其閉糴者名赴官官爲之借明日爭持狀赴府官爲署券付鄉老俾同保借又得米八萬石又不繼乃會計軍餉一年之外餘二十萬石發以賑之同官有以事未

上聞難者公曰民命在湏臾奏乞而後給則無及矣專擅之罪吾自當之是歲稔活飢民殆四十萬口事聞加陞浙江左叅政仍掌郡事降勅褒獎是年秋再陞左僉都御史巡撫江南總

理兵民財賦并理嘉湖杭三府糧儲提督屯種公受命後汲汲於培植拯救採察咨詢於官吏則獎廉能黜貪懦於民則杜奸究抑豪右浚孟瀆卅徙二河增築奔牛二牌以便運道又奏減歲課之重者凡十餘事戊子奉勅飭理兩浙鹽法己丑又勅考察文武官員凡軍民利病悉聽從宜處置庚寅秋議事來京上章乞致仕不允章再上始得請時年五十有五也家居者十有二年至是卒年六十有六公配林氏封孺人生子三長頊林出次璋次理少房劉氏出女三馮洛雲霸陳繼宗其壻也孫一旦頊將以卒之明年月日葬公於邑中銅斗山之陽公稟性廉介於人少委曲言論之際是是非非不少假借性好讀書於詩文雖少作然所作有意趣不爲無益之語字畫亦道美

有法晚年家居時尊翁踰八袞公奉養備至友愛諸弟其田產多以讓之足跡未嘗至城市凡一切外務畧不介意暇日杖藜徐行田圃間自樂而已構草亭於所居之前顏之曰湄丘因自號湄丘道人云銘曰

極天南隅環海一區孰知其中有此鉅夫為邦司直凜其不  
詘明靈之典而不傷乎物為民師帥不赫厥聲盡牧之職而  
必遂其生出處以正進退惟禮君子之心大臣之體鄉邦是  
賴焯有其光幸我後死為銘其藏成化十八年

墓表

景婁處士錢君墓表

世方以意氣相尚自是其是而盡非一世之人有人於此人以  
惡聲相加非理相干乃能吞聲下氣以容忍之豈非中庸所謂  
寬柔不報之君子人歟常之錫山有錢君者吳越王鏐之遠裔  
髫髻時就外傳于里塾習四書句讀聽其講解若有得於南方  
之強一語既長涉獵史鑑於唐婁貞公誨第唾面待乾之語深  
有省焉曰此人子處世保身孝親全宗之經驗方也因書景婁  
二字顏所居室而因以為號人亦以是稱之云君號景婁諱曰  
清伯清其字也曾祖號文林諱曰伯剛祖號梅堂諱曰公達父  
號貞庵諱曰惟常三世相承隱居不仕然皆讀書尚禮為鄉聞  
人君生十八日而母鄒歿在童稚時嘗夢見其母覺而質諸人  
其聲音笑貌宛然母也人以為孝誠所感父嘗有疾君每夕稽  
顙北辰祈以身代割股肉以療之者再歷事繼母三人曰李曰

吳曰鄒皆得其歡心而事吳者尤久人不知其不出於吳也有  
弟七人君居長一弟蚤亡以其子模後之而撫其妻孤甚厚其  
六人者父歿時尚幼爲之冠婚均授以產人無間於其弟之言  
君先世自嘉興徙邑之新安鄉又自新安來贅周氏居垂慶鄉  
兩鄉父母二族待君以舉火者數十家君好善樂施出於天性  
人有緩急來叩門飢無食者寒無衣者死不能葬及欲葬而無  
地者隨求而應咸如所願其他如立義塾以教鄉之子弟建橋  
梁以濟路之病涉施藥合以救人疾病諸如此類皆世人所難  
能者也而君能之蓋自其寡柔以教犯而不校一念中來不徒  
言之而且行之不待強而仁爲一方君子不足以盡之雖通之  
天下可也君儀觀偉甚未嘗疾言遽色善自保養老而益健邑

大夫歲行鄉飲酒禮以書速君正賓席終不赴家有祠堂晨必  
謁出入必告朔望必參有新物必薦忌及節祠時祭必率子弟  
行禮既老且病不廢至是歲暮病且革猶力疾欲如常時力不  
能支乃集長幼而訣之曰吾壽有餘而心不愧亦足以自獻于  
先人矣爲吾子孫勿墜先緒可也遂不語三日而卒時弘治辛  
亥十二月晦也享年七十有六君配鄒氏繼孫氏皆恪脩婦道  
先君而卒子男三長楨次卽模次棟女四華濂同樂司馬悅華  
昌其壻也孫男七人諫諤評訥誥詔議女三人楨等卜以癸丑  
歲四月丙午葬君于邑之開化鄉父塋之左是歲從子某以計  
偕赴京不及從葬既而登進士第乃介太常少卿馬君宗勉持  
君從弟洪所狀行實侑以雲間錢文通公原溥武進王天官廷

貴姑蘇吳少宰原博諸公所作詩文求予言表其墓據狀君爲人賢而孝且惇義好禮而諸公又皆不輕許可人者其言鑿鑿乎非虛庶幾所謂文獻足徵者故不辭而爲次第其說使表于墓道以示于後人

### 海航處士趙君墓表

浙西自昔多善富之家而皆以田農起率守道循理各安其分而世其業近日或乃有離制而棄本忘其身之爲齊民而不知所以品節限制焉者有能於風靡波頹之中而知以持盈爲戒恐或淪於失墜豈非善人君子哉常之無錫鴻山趙氏故宋室之遠裔有號海航者其言曰人涉世如舟之浮于海也盈滿而不知所戒則將有沉覆之患矣故以海航爲號人亦以是稱之

予友陳朝用昔遣屬天官時常屬予爲作海航序今爲福建方伯以事上京師復請爲文以表其墓且出其所撰狀曰君諱灞字廣洋海航其別號也系出宋盛國公叔黔後南渡初自汴南來居平江之臨頓里平江今蘇郡也叔黔生朝請大夫本之本之生大中大夫公禮四傳至若勝若勝生吉甫君之高祖也再徙長洲之南橋吉甫生繼道君之曾祖也國初來贅無錫唐氏故今爲無錫人繼道生公韞號聽鶴君之祖也公韞生汝明號怡菊君之父也君生稟異常類河朔間人時方以侈靡相尚意氣相加游玩爲樂君獨平心易氣動生務本歛華就實未嘗佚游慢戲以棄日非禮恣肆以殄物恃財怙勢以凌人介然以安分知足自戒畏刑惜福爲心嘗代父役爲根區之長更繇

租賦惟其公有後期者姑緩之或代之輸而徐取其償曰吾與  
若皆編戶也徒以物力優於彼爲之督爾租了官事幸無相貽  
累足矣父老代掌家事歲取租於佃田者量歲豐凶而多寡其  
取予有所欠負未嘗盡其償曰吾借力於若若資食於吾皆不  
可相無者苟了官租而微有所得足矣人有不平事多質於君  
君曰吾非有司也曲直之判豈所敢當但是非之心人皆有之  
請以是非之理折之某人爲是某人爲非無不悅服有疑難之  
事多決於君君曰吾幼失學事體未有所諳因君之事而斷以  
吾心之理如此則可如彼則否犁然咸當於人心人之緩急叩  
門者必如所欲而不使之歛望去非禮相干亦必以理遣之而  
不爲已甚君之直誠直道不但行于家庭乎于鄉黨而郡邑大

夫遇有疑難亦進君議焉君盡言以達已意巽辭以啓上聽未  
嘗順旨而有後言行已處事必畏清議痛自克責惟恐以短取  
敗而有以廢墜前人之基業焉至是疾革語其子曰吾祖宗寸  
積絲累成此家業傳序以及於吾終日乾乾如操滿載之舟泛  
不測之淵惟恐不幸遭值風波以傾覆所有幸而今日至于舟  
抵岬矣此舟付於汝宜操吾此心以保世業吾得以籍手見汝  
祖宗于地下矣言訖而卒時弘治己酉正月二十八日也距其  
生正統丙辰得年五十有四配孺人過氏宋郡馬之後子男一  
楠以例輸邊餉得蘇州衛指揮僉事女子一適邑士華基孫男  
一福齡以某月某日葬于某山之原君天性孝友事親能順適  
其意處二弟怡怡如也從弟傑幼孤貧爲婚娶置田宅居之女

之子蔡某蚤失怙君養于家延師教之俾至成立其他義舉如  
施棺槨造輿梁通水利之類不一而足皆衆所共知者若君者  
豈史所謂貴誼而賤利三代所以有道而行者歟予目之以善  
人君子非過也茲因其請爲文以表于墓道用垂世楷範豈有  
紀其歲月識其兆域以應其求而已哉

銘

德馨堂銘有序

凡物有形斯有氣臭有氣臭則馨鄉隨之三代以前求  
馨鄉於蕭鬯臍管春秋戰國以來求馨鄉於椒蘭蕙芷  
漢魏以後至于今日則求諸沉檀腦麝隨世所尚而用  
之各有不同孰知斯德之馨亘古今而無間不假氣臭

而自然發聞也哉知此理者其周公乎成王述其言曰  
黍稷非馨明德惟馨蓋以見精華之上達果在人而不  
專於物也後此千餘年唐人劉禹錫作陋室銘有斯是  
陋室惟吾德馨之句蓋祖周人之意也又數百年安成  
書岡耘者張公如旭新居落成或人賀之以詩有眼前  
多少幽人宅寧似其中有德馨之句則又述唐人之意  
也公去世已久而其子若孫席其德善餘慶傳芳播芬  
書香至今不絕膏馥之沾漑蓋未艾也予友國子司業  
振烈公之孫也借其伯兄振光摘詩言以顏祖居之堂  
曰德馨示不忘本也振烈間以語予俾爲銘乃銘之曰  
有物至馨非氣非味無假乎熟奚事於佩有韞於中必聞于外

有積于前必延于世室以不陋人以無愧苾芬之播無遠不至膏馥之沾罔有攸既伊誰則然書圖張氏祖以啓之孫子是繼繼繼承承尚引毋替成化四年

箴

忠箴

君者臣之天臣之所以事其天者忠也是忠也與生俱生而由乎當然之義是則所謂天降之衷也衷降于天乃人所受之中人體之以事君必盡厥心必委厥躬不敢私其有不敢阿其同犯則弗逆以激順則弗曲而從也於戲戴天以生曷報其功一言以蔽之曰爲臣死忠

孝箴

親者子之天子之所以事其天者孝也是孝也與生俱生而本乎自然之仁是則所謂率性之道也道形於人乃天所命之要人體之以事親必用厥情必善厥紹不敢逆其志不敢違其好形則不毀以傷德則克全而肖也於戲昊天罔極無德以報一言以蔽之曰爲子死孝

賦

南溟竒甸賦有序

伏讀

太祖高皇帝御製文集其勞海南衛指揮勅有曰南溟之浩瀚中有竒甸數千里地居炎方多熱少寒是時瓊郡入職方僅再暮其地在炎天漲海之外荒僻鄙陋而我



聖祖卽視之以畿甸而褒之以奇之一言豈無意哉謹按文集凡若干卷其中勞天下軍衛詔勅何啻百數大率叙其邊徼險遠將領勤勞征戍艱苦而已未始有褒美其疆域若此者噫

聖人之心與天通物之美惡必豫有以知其後之所必然於千百載之前則夫吾郡之在今日民物繁庶風俗淳美賢才彙興無以異乎神州赤縣之間且復俊邁奇詭迥異常儔有由然哉濬世家于海南北學于中國偶有所見謹拜手稽首而為之賦曰

爰有奇甸在南溟中邈輿圖之垂盡綿地脉以潜通山別起而為崑崙水畢歸以為溟渤氣以直達而專勢以不分而是藹山

綿延茲其獨也百川瀾茫茲其谷也豈非貞嶠瀛洲之別區神

州亦縣之在異域者邪有奇一上全鍾其氣北學於中國頡頏

乎天下之士於是叫閭闔呈琅玕翺翔乎玉堂徘徊乎道山肆

言六合之外馳騁百氏之間自詭所生之奇勝敢為高論恣為

大言翰林主人聞之駭而訝焉曰吁子來前子生寰區之外漲

海之邊學何所受道何所傳何所從而至何所見而云然試為

我一言之吾將卽子之所云云者以紀載於簡編士曰唯唯

乃作而言曰自夫天一生水融而為川地十成土結而為山川

者天地之血脉山者天地之肌骨血脉流行於肌骨之中決

于中而外出出乎外而環其中是為一大堪輿也具元氣之渾

淪容日月之出沒然而大堪輿之外突起於浩漾之中而為小

堪輿者又不知其凡幾窟穴也是故其大而顯者為帝王之宇  
其小而幽者為神仙之丘帝王之宇是為神州赤縣神仙之丘  
是為員嶠瀛洲一則非骨蛇羽化莫能到而非常理一則雖聲  
明文物之所萃而非真游惟走所居之地介乎仙凡之間類乎  
島夷而不夷有如仙境而匪仙以衣冠禮樂之俗居閩風玄圃  
之嶼勢盡而氣脉不斷域小而結局斯全九州一大宇茲為其  
奧四海一通川茲為其竅上至北極僅十九度於天為近遠至  
神京幾一萬里於地為大茫茫巨浸兮與天為界漠漠平川兮  
壯地之介豈非天造地設藏此奇勝於遼絕之域用以見天聽  
之孔卑表王化之無外邪其為甸也可謂奇矣然奇而不怪焉  
翰林主人曰子之言辯矣豈其然歟載考諸古茲地禹貢之所  
不載職方之所不書郡縣治漢武之世分野僅星紀之餘在漢  
七世固嘗棄之蓋不以之為有無也且甸者王畿之名非所以  
為遐外之域奇者殊常之稱不可以加寂寞之墟子之言何所  
據而云乎士曰茲豈走之言哉於是乎惕然興悚然懼舉手加  
額北望向天百拜稽首而颺言曰此我

太祖聖神文武統天大孝高皇帝金口之所宣也大哉

至言乎自吾茲地而得茲言地若增而高物若加而妍山林草  
木濯濯然如在昆吾御宿之近封疆畛域整整然如與侯服邦  
畿以相連嗟夫地以人勝從昔則然蘭渚以羲之而著天台以  
孫綽而傳夫以殘山剩水之勝一經騷人墨客之所賞詠尚揚  
芳於四外流美於當年矧茲奇甸環海以為疆者餘二千里縱

步以行兮地雖甚遐仰首而觀兮天則伊邇一經

大聖人之所品題山勢駸駸而內向波光躍躍而立起物則且  
然人可知已然則走所言者豈無所以邪主人乃仰焉而思俯  
焉而嘆曰良有以也願聞其所以士曰走也少而游岸序壯而  
走四方雖生於是甸之中而甸之所以爲奇也容有所不能詳  
蓋嘗歷考夫禹益之所記緬想夫章亥之所步古往今來之宙  
上下四方之宇天左舒而起牽牛地右闢而起昴畢天有四維  
地有四極東至于秦遠西踰于邠國南訖于濮鈇北底于祝栗  
管子言名山三千墨氏云名川三百三百之川總歸匯于東南  
二千之山皆發原於西北是則海者川之所委嶺者山之所積  
茲甸也居嶺海之盡處又越其涯而獨出別開絕島千里之疆

總收中原百道之脉者也原夫天下之山皆自夫崑崙而來越  
戍而復出險即夷分爲兩戒析爲三支其中一支自中條經淮  
越江而極于衡霍遂散亂而分披至此而地勢將盡乃益險巖  
嶮巖巖嶮嶮嶮嶮嶮孰知一脉透出於瀛海之外其地可畫而  
井無以異於秦晉之近圻觀夫天下之川皆至於溟渤而止滔  
滔汨汨雖日趨於東然皆折於南西而後已大起而爲國都小  
起而爲洲坻其尾閭收萬水而諸衆流遂浩漾而無涯矣自此  
而水勢益下弱莫能起膠瀉沆養渺沔濯洸孰知一島孤峙于  
瀛海之中其地可葦而航無以異於湖江之流水海可度兮不  
踰百里山可登兮不踰尋丈舟之行也朝斯往而夕斯返人之  
游也足可履而手可杖意其硯硯硯乃爾坦然夷曠意其汗

汗涸田乃爾悠然平漫最爾小方外之封疆宛然大域中之氣  
象陽明勝而氣之運也無息機土性殊而物之生也多奇相草  
終冬而不零花非春而亦放境臨乎極邊而匪寒海洩其苑氣  
而無瘴地四平以受敵無固可負歲三穫以常穰有積可仰通  
衢絕乞丐之夫幽谷多耆老之丈古無戰場軼語信乎有微地  
爲頗善符言斷乎非妄民生存古朴之風物產有瑰奇之狀其  
植物則郁乎其文采馥乎其芬馨陸摘水挂異類殊名其動物  
則彪炳而有文馴和而善鳴陸產川游詭象奇形凡夫天下之  
所常有者茲無不有而又有其所素無者於茲生焉歲有八蠶  
之繭田有數種之禾山富薯芋水廣鱸鱉所生之品非一可食  
之物孔多兼華夷之所產備南北之所有木乃生水樹或出耐

麩苞于椰豆筴于柳竹或肖人之面果或像人之手蠟出波兮  
凝石鱖橫港兮堆阜小鳳集而色五並蠶遊而數偶脩蝦而龍  
鬚文魚而鸚喙鱗登陸兮或變火鳩樹垂根兮乃擗金狗魁綠  
樹杪而飛馬乘果下而走魚之皮可以容刀蚌之殼用以盛酒  
波底之砂行如郭索海筵之貝大如玉斗花黎靡刻而文烏楠  
不涅而黝椰一物而十用其宜椰三合而四德可取木之精液  
爇之可通神明鳥之毳毛製之可飾容首有自然之器具有繁  
然之文繡天下皆有於菟茲獨無之豈天欲居民之蕃息於此  
常夜戶不閉而無觸藩之虞乎江南皆無蚱蜢茲獨有之豈天  
欲寓公之久居于此使照壁見喜而無北風之思乎噫斯地也  
近隄雷厲僅一水耳而物之生也乃爾不同遠去齊晉殆萬里

兮而氣之通也胡爲無異若是者雖云生物之偶然安知造物者之無深意也然則茲甸之所以爲甸而奇之所以奇者庸有在於主人曰然此物之奇爾如人何無乃奇之爲奇獨鍾於物而遺於人邪士曰不然天地盛大流行之氣始於北而行於南始也黃帝北都涿鹿中而堯舜漸南而都於河東其後成周之盛乃自豐鎬又南而宅於洛中蓋自北而漸南非獨天地之氣爲然而帝王之治亦循是以爲始終蓋水生天一而坎位於北而艮之爲山又介乎東北之間自北而東折歸於南其氣之所以融結而流行者非止乎一水一山之餘而爲嶺水之委而爲海而是甸居乎嶺海之外收其散而一之透其餘而出之所以通其鬱而結其解其域最遠其勢最下其脉最細是以開

闢以來天地盛大流行之氣獨後其至至遲而發也遲固其理也亦其勢焉是以三代以前茲地在荒服之外而爲駱越之域至于有漢之五葉始偕七郡而入于中國曼胡之纓未易也椎結卉服之風未革也持章甫而適之尚懵而未之識也魏晉以後中原多故衣冠之族或宦或商或遷或戍紛紛日來聚廬託處薰染過化歲異而月或不同世變風移久假而客反爲主靡獷悍以仁柔易介鱗而布縷今則禮義之俗日新矣絃誦之聲相聞矣衣冠禮樂彬彬然盛矣北仕于中國而與四方髦士相後先矣策名 天府列迹縉紳其表表者蓋已冠冕佩玉立于天子殿陛之間行道以濟時而堯舜其君民矣孰云所謂奇者顛在物而不在人哉主人乃離席而立拱手而言曰神矣哉

聖神之見乎其所謂竒者蓋至是乎驗矣士曰不然何地不生才而才生不擇地人才之生何地無之竒哉竒哉豈止是哉當我  
聖祖肇基之初輿圖際天地兵衛極邊鄙絲綸之音雲漢之章無日而不下無處而不至然而竒甸之言乃獨以專美乎茲地非甸而謂之甸未竒而豫期以竒豈無意哉蓋  
帝王之言代乎上帝

聖人之心通乎天地故能握乾符而妙奪神功闡坤珎而斡旋厚勢遠移而近書軌合以皆同質變以文聲教暨而靡異咫尺之間振舉乎萬里斯須之頃流通乎百世化庸腐以為神竒變雜駁以為精粹遐今如邇未焉如既凡其所期兮罔或不遂引而弗替兮終萬古而常常如是是則斯地之所以為甸而甸之所以為竒雖造設於天地然所以表而章之昭示於萬世者實本乎奉天啓運宰制山河之

聖帝翰林主人聆茲言也輾然以哈憮然以喟曰秘矣哉天之藏此地也遠矣哉

聖人之期此地也自夫天開地闢以至今日不知凡幾運於世矣自夫開疆辟土以建此區不知凡幾王幾帝矣然而多視之以窮荒或遂至於遐棄孰謂其今日有是哉不假詞臣之代言不出輔臣之建議一日無上事發淵衷運睿思形之於言以為絲綸之製夫豈無所為哉

皇之言天之意也士言及此亦竒士哉於是三復士言而繼之

以歌曰

明明我

聖祖兮載闢地而開天

上帝眷顧兮付以其所覆之全仁周八表兮顧獨惓惓於窮海之一垧竒哉斯甸兮何幸得

聖人品題之言千秋萬祀兮長炳炳琅琅乎天地之間

懷鄉賦

送友人劉尚德有序

每因送人處憶得別家時此唐人詩也嗚呼爲此詩者其能深體人情者哉某去家今十有六年矣鄉土之思無日而不展轉于懷徒以國家之制

地封之典必限以歷官之歲月以故情事尚未申也去年

冬友人劉君尚德應進士舉來京師又別而晤不勝空谷足音之喜今歲試禮闈不合而去某於尚德鄉曲交游中最厚者也因其別而動乎情方寸惻然有不能自已者因述中心所懷者以爲賦一以寫吾鄉土之思一以慰吾弟兄之望一以志吾朋友之別云

懷吾鄉兮何所渺雲山兮萬里界鯨波之浩漫兮途有梗之未通曰吾心之切切兮無日而不南征晝神想以遐鶩兮宵夢寐而靡寧母氏垂白之待養兮伯兮獨立以矻矻雖顯揚之足慕兮恒甚懼以交并桑梓蔚其深茂兮昔可把而今拱者舊日以凋謝兮哀壘壘其多瓏朝吾登乎金門兮夕偃蹇乎玉堂置身非不高兮信美非吾之鄉入結群仙之綬兮出聯七貴之鑣游

從非不多兮匪吾髻鬣之交退默默以獨處兮念平生之往事  
宛山川與閭巷兮默其可指以示恨無縮地之術兮孰挿予以  
雙翅馳寸心於萬里兮幾將歸兮猶未惟人情同於懷土兮豈  
以窮達而異彼志得而情遷兮乃獨非人之類年洋洋其日往  
兮百歲幾何較富貴之與名節兮所得孰多苟情義之不申兮  
焉用其他幸吾子之茲來兮若聞足音於空谷也申告吾以  
鄉曲之故兮語用三而不以為瀆也或為之忻忻兮或為之戚  
戚或可愕而可駭兮或可矜而可惜或慚而為之忸怩兮或傷  
而為之怵惕岢然而興兮俄然而衰奄然其去兮儻然其來歷  
寒暑十有六變兮恍如一瞬天人倚伏有必然之理兮孰云邈  
而難信每促膝以劇談兮輒嘆息而不休情悄悄而不自已兮  
涕或浪浪以橫流方資其朝夕以箴規兮胡數奇而弗售彼惟  
索驥以其圖兮曾莫知神駿之求君子出處惟其時兮樂天知  
命夫奚尤又將別予以去兮仍海上之仙丘闡天人之妙理兮  
傳嗣子以箕裘翩然以遐征兮嗟欲挽而莫留矢吾辭以志別  
兮因以寫吾之心行何以處我兮毋金玉兮爾音自薊北而越  
南兮閱半載之光陰既沿復遡止且行兮杳不知山高而海深  
抵瓊臺而見鄉人兮道予心之來懷也慰吾親倚閭之思兮曰  
不久請告而來歸也成年

別知後賦

予交凌江李君時習有志之士也蚤以書經領鄉薦三  
試春官皆中乙榜當得校官君不屑就最後有司限以



年不容辭乃授閩之南靖教諭改求之寧遠南昌之豐  
城前後掌邑教者餘二十年所至率以身教以興起人  
才爲已任而於一切勢利泊如也嘗三典文衡初同考  
河南在江右山西皆主試一時號稱得人噫若君者豈  
今世校官中之表表者歟今年需選銓曹陞淮安府學  
教授予與君同出嶺表方君年少氣銳時謂功名可唾  
手取於同輩少許可獨與予及寶安袁秉中三人者交  
莫逆君教外庠秉中遙屬地官出知大府予叨登進士  
選入翰林相去各數千里二人者其心未始一日相忘  
也君初赴南靖時予與君同舟而南及君自寧遠守制  
家居予以家艱南還道凌江君遠至大庾下相迎候迨  
予北上君時在豐城去冬考滿上

京師相聚者幾半年今又舍予以去顧予三人者頭顱  
俱種種矣秉中以永州知府養病歸寶安不相見者幾  
二十稔矣而予與君幸頻相會晤今君又幸教淮安郡  
居兩京間會後有可期者念惟人生以百歲爲期七十  
者古以爲稀今予與君去稀年僅僅十三四春秋耳自  
茲以後歡晤之期寧有幾耶則予於君之行也安能嘿  
嘿無一語耶而其所以相贈處者又豈可泛同衆人者  
而已耶昔秉中有梧州之行予嘗爲之作別知賦故於  
君之行也又廣其意作別知後賦以寓予區區又要之  
情賦曰

嗟南州之綿邈兮在昔則爲遐荒迨有唐之五葉兮始發乎曲  
江之張原其所繇以奮起兮有燕國以爲之援予中懷之悄悄  
兮豈忘情於鄉彥顧時勢有弗然兮地若親而實遠結綬之約  
雖不可諧兮敢忘乎鷄壇之要念疇昔之游從兮予三人俱老  
以衰悵一人之先歸兮恐盍簪之無期今子又舍予以去兮焉  
能默默以無辭曰道之同兮不以其位心之孚兮不必其昵情  
苟無變於貴賤死生迹奚較夫得失同異惟德義之相期斯交  
情之爲至踵鄉衮之芳躅兮其有在乎吾徒隔百世而同此心  
兮奚必區區形迹之拘昔孔孟之垂世兮亦傳經以施教固不  
假乎位與勢兮然後可行其道矧淮海之名邦兮介乎兩京之  
間申講堂以振說鈴兮列衿佩之兩班明道術以淑人兮敦禮  
義以正俗懸以待問之鍾兮示以躍如之鵠泰山兮巖巖和風  
兮熙熙秋陽兮皜皜時雨兮祁祁偉英才之樂育庶斯文之在  
茲倘心期之克遂又何異乎步趨之追隨

瓊臺會稿卷之十終

生員戴士民校正

瓊臺會集卷之十一

瓊山丘文莊公濬著

五言古詩

古意

千金買寶刀，百金買角觿。寶刀頭有環，角觿能解絲。慙慙寄遠人，用以慰所思。所思不見察，幽獨甘自怡。

客從天上來，贈我雲錦章。五色光奪目，上有雙鸞翔。秘之不用篋，笥謹什藏。幸然遇良工，爲我裁衣裳。結以紫霞綬，佩以鳴玉璫。服之朝九重，文采何赫煌。盛服今所尚，令德古所藏。珍重鸛鷓詩，三復不敢忘。

逝川無回流，落日不再午。人生百歲間，役役徒自苦。朝爲樹上

花暮作花下土去住無常勢奄忽成今古反袂問蒼天天乎柰  
何許

感興

人生會有老老至不自知壯心恒未已外貌忽已移青青中  
髮俄然成素絲灼灼鏡中顏忽覺如枯梨盛年不可恃行樂須  
及時有酒且痛飲不醉將奚爲

天際多剛風滄溟隔弱水相思不可極之子在萬里萬里各一  
天恍惚在我前區區倘見察敢不輸中情

過友人園居

愛此林泉勝載酒時來過芳樹發春華方池激清波嘉魚爭出  
躍好鳥鳴相和天氣旣已暄景物亦已多主人雅好客相對酣

歌歌竟各嘆息人生能幾何

月下懷

明月空中懸碧雲天際合美人渺何許望望轉蕭索翩翩驚鶻  
定片片簷花落惻然對孤影下帷閉齋閣

夜坐和張曲江感遇詩韻

空齋坐幽獨夜氣澹以清冥心古聖賢悠哉怡我情天機一何  
深神理亦已精云胡契其妙勉旃惟思誠

鳳凰翔千仞枳棘安足顧一朝覽德輝棲止梧桐樹飛鳴恒自  
由羅網豈能懼三靈爲我儔百鳥莫子惡笑彼冥飛鴻猶爲弋  
人慕

南極有名相風度邈難得鳴臬群刺天孤鳳戢其翼韶石佳山

水因之增秀色班班青史間流譽靡終極莊誦感遇詩臨風三嘆息

深源無淺流高樹無卑枝人生天地間奮發須有爲不見東注波逝者恒如斯心中苟自盡意外非所知嗟爾亡羊者紛紛多路岐

擬古

江南秋風至草木變焜黃淅淅吹妾衣使妾增悲涼悲涼知爲誰良人在沙場暮聽胡馬嘶朝看胡鴈翔飢殮風中糜渴飲雪下漿羊角衝地起沙礫爭飛揚回首望故鄉長天但茫茫豈無肥與甘亦有衣與裳妾心空惻惻路遠莫寄將北望長太息涕淚如雨霧幾欲徃從之河廣無舟梁仰天籲上帝矢心期不忘但願南風競吹君來妾旁

又

燕集高堂上衆味羅珍羞觥籌互交錯樂矣忘其憂清醕飲桑落妙聲發吳謳寶晷噴清烟芬芳襲輕裘肥醲正厭飫文錦何溫柔獨念良人苦遠戍陰山頭黃茅連白沙風雲寒颼颼凍雀飛不起依樹鳴啁啾馬毛縮如蝟髀肉胝生周羔裘煖如烘漣酪清如油君身千萬艱妾心千萬愁夢寐或見之道路阻且修願言早成功諸將各封侯良人章章來紅日照九州

依依重依依不忍生別離別離已可悲况值秋風時柳衰不堪折情悲不堪說願妾爲小星君身化明月明月貼天飛小星恒相隨月出星隨出月歸星亦歸莫學秋胡妻相逢不相識生者

固可慚死者亦何益

白日日已晚行人日已遠秋風又重來行人猶未返颼颼朔風寒行人衣應單世無杞梁妻千載徒悲酸

分韻得勿字送李應禎

予友李應禎筮仕未叶吉如金方在鎔如女猶處室少小思用世頃刻惟惜日奮志向霄漢棲迹尚圭筆至寶恒自珍深藏不輕出高騫終遠到暫蹶未為失著存心五思克念躬四勿矻矻良獨苦搢搢一何切潛心入混茫沉思超恍惚物理無窮盡志願罔終畢九轉紫府冊三嘆清廟瑟妙削鼻汗重快刃縷濡血揮霍迅雷變倏忽浮漚滅葩華絢詞林根柢蟠窟壘出山我我一瀉水滴滴冥搜鬼為愁悲壯石可裂堅壁仆旗鼓開門合

車轍誓將古道敦不必時世悅藥籠富芝苓家園乏芋栗空懸萬軸鐵寧有千樹漆削雕返淳樸歛華就真實禹鼎窮物怪商敦太古拙茫昧鳥跡餘浩蕩鷗波沒片言無欠剩一覽備始末游鷗未擊水顧兔久藏穴舉世少具眼誰人識奇骨焚舟取勝師即是前日卒際遇會有時造化本無物無人摺我脇亦不擢彼髮惟持方寸觴獨解千古結紛紛兒女輩得喪輒嗚咽慨慷發浩歌一笑為洗雪贈我錦繡段輸君龍縞鞵應知同此心未肯屈茲膝從革金百鍊朝宗水萬折豈念欵段馬不憚寬博褐胷中浩然氣需時一發泄見者使心降聞之須股慄朝陽孤鳳鳴太虛衆星列宛轉似綉繭次第同比櫛闔肆千萬言勿效塗且抹賈生直後才孟氏豈迂闊直道古所貴正言世方渴工巧

由三折頓悟在一喝衆心鷄犬放群言蛙蟬聒就中一轉語乃  
至無有說人才無古今儒道有始卒日月既精明乾坤亦軒豁  
沛如縱壑魚奮若獨擊鵠坐令齷齪者縮首看馳突匪惟當世  
重要與古人輕功名殊孟浪歸志甚勇決北風吹南船順流去  
何疾悠悠聊自寬耿耿竟難奪和璧三獻有楚城再舉拔撫掌  
拍霜鏗酒酣清興發眼將空海宇氣欲吞恒碣男兒負奇志與  
世相未 何時乘長風登天問明月我生命在天吾道豈終絕  
從來君子心迥與世俗別四海皆兄弟奚用憂離析貴爵異趙  
孟美色匪褒如勉旃思至理寤寐想前哲前哲雖已矣垂世有  
謨烈况乃靈臺中源頭水長活蹇予二三子追趨青瑣闥結綬  
獨少君忍送出城闕江頭秋草衰天際寒蟾缺去去將柰何歸

岐愧先達

送廣東夏廉憲

天順癸未

當宁念遠氓塗炭日以極 詔東在廷臣往振風紀職僉曰御  
史某秉德剛且直屬耳按江右風聲甚輝赫兵政旣以舉吏弊  
亦以革謠言聞遠近公論推第一無如斯人可拜手荅明勅

天子曰俞哉超授三品秩

天語重丁寧

綸命光鳥奕百僚

無間言相見咸喏喏而我嶺南入喜幸倍千百預為鄉人喜從  
此得蘇息特恩許乘傳 陛辭行有日走也官禁近早有半面  
識中心久有懷臨分忍緘默聊為陳本末幸與垂采擇惟茲東  
廣地富麗自古昔秦祔已內附漢後益廣斥東西數千里十郡  
六十邑衛所錯其間小大五十七憶昔全盛時承平久寧謐家

家有蓋藏人人各安適土著少流徙世業足資給士族尚詩禮  
農家務耕織先期輸賦稅俛首供力役民不受箠楚兵不識鋒  
鏑行旅不齎糧遠出不待吉昏夜絕剽竊歎歲無行乞况復天  
氣暄地利多所獲三冬著苧衣五月收新植山畝少汗萊水田  
自潮汐舟游泛滄茫火種燒劣崩曉包趨墟飯晴着登山履海  
錯富蚌蜆家畜剽豚駝文木生山林珍貨來蕃舶荔奴然火樹  
橘柚垂金實間右食素封田圃盛嘉植愛身寧破產終訟羞珥  
筆遐邇總安恬公私舉豐殖溯彼廿年前長吏恣胸臆厚利動  
其中甘言誘其側欺彼民柔愚藐茲地遐僻遂決禮義防大肆  
搏筮力把臂褫其衣抉口奪之食溪壑填不滿氣焰撲難熄上  
下相師承前後遞沿襲豈云無鷹鷂方自為蠶螭天門遠萬里

無地訴冤抑致令仁厚性化作克險質弄兵潢池中延息苟旦  
夕外邪尋即除中虛遂成疾蠹茲洞中徭窺伺乘間隙始惟掠  
近地稍稍出復匿迹彼素脆悞頓異戎與貊制伏本非艱而我  
狃安逸武胄耻言兵文吏諱申賊縱虎出林薄延鬼入居宅路  
有橫草虞閔無一夫楹長驅捲村落乘夜盜城壁豈彼智有餘  
乃我法不立歲歲轉猖披邊境遭輻輳脅從日漸多徒類日增  
益居民就流散人煙渺蕭瑟已身不自卹何暇問家室田蕪乏  
犢耕井渫無人汲萬家春草青一望秋地赤禾麻種殆絕鷄犬  
聲亦寂昏雨鬼火青涼月死骨白內地幸苟免因之困供億相  
扇咸弗靖濡沫耶戢戢方今堯舜朝大臣總臯稷萬國俱時  
雍一方獨艱阨九重赫然怒遣將擣其窟天道信好還王師



本無敵鼎魚姑假喘穴蟻難藏迹行當見掃平腥穢末蕩滌却  
愁火然崗罔辨玉與石嗟爾嶺徼人罹此殊可惜賈父來每晚  
謝令去不亟由來非一朝徃者何嗟及幸茲天日開光景方昭  
熠草木回生意山川增秀色福星離紫垣甘雨隨丹軾指日下  
滇江持節鎮南國先聲一以聞父老懼以泣迎拜古道旁應以  
手加額願言明使君代天布仁德爲我招殘魂爲我肉枯骸爲  
我作保障爲我剪荆棘爲我開喉吻爲我插羽翼醫我眼前瘡  
除我腹中匣我寒衣以喪我飢食以粒生者受我廬死者與我  
柩一夫或失所孰非使君責使君今已行已行去須急齊民正  
倒懸異類尚及及如病望醫師如旱望雨澤寄聲報吾人此公  
古難得瘴海行將清貪泉不能惑佇看凋弊區復作全盛域

王推官輓章

王公豫章秀遠派琅琊種起家汀郡幕臨事一何勇理解牛無  
全善駕馬不要長官但坐嘯民吏共頌竦宛結得爬梳善矣賴德  
惠持守屹山立議論肆泉涌借寇一以聞天子錫嘉寵起升理  
刑職郡事咸銓總詩書用法比何參變周孔訟謀絕寃抑囹圄  
無桔拳刀劍化牛犢游惰還播稔沙寇忽然起八郡咸混瀕臨  
汀切近災相扇亦洶洶烽火照大紅四境若草莽山居孤城危  
蟻附群盜擁外援幾遏絕內事紛控億萬口方嗷嗷恃公以不  
恐彼哉肆克焰不趨石與珥仁言利甚博老稚免系踵餘寇侵  
寧化危若冒巢醜衆方縮首觀公獨奮前捕丁夫旣爭先乘馬  
亦思驟至今楊柳陂過者猶木悚名方達

帝閤日未覩清拱天何不憇遺遽爾返冥濛訃音聞六邑老穉  
爭躋踴世紀羅池廟民思桐鄉家食報不在身有子繼晁董文  
名冠天下撞金抽獨蛹推恩自天來龍章賁丘壠水若增  
滄淪山如益龍從我為作輓章不厭辭費冗

雜詩成化己亥

羲馭行太空海宇仰其光咫尺蒼海隅羣鳥集扶桑乘時競奮  
飛引脰鳴朝陽衆鳥欣有託後先低回翔冥鴻吊孤影四顧慚  
且傷

我聞崑崙山玄圃多珍禽向日絢彩羽遡風振華音聲徹九層  
霄氣壓千山岑雲飛天靡高水擊海靡深紛紛衆黃口斂翼知  
所欽一鷗來自南質小力不任割爾叫一聲群然顫而喑卑卑

垂其翹深入茗葦林

南國有珍木中含要妙音匠氏一顧之斲削為素琴絙以朱絲  
絃寄以太古心時時橫膝上山水託意深別鶴為翔舞游魚躍  
幽沉云胡世俗耳不如魚與禽雅鄭竟莫分吾心安所任

冀北產良馬未必皆駒駉乘之惟其良何必以地拘我聞開  
國初羅鬼生龍駒貢之入天闕用以駕鼓車疾徐皆中節步驟  
何雍如紛紛內地產不能並馳驅安知今所良在昔非其駑按  
索久成俗誰為焚其圖世無九方臯嘆息還椰榆

貧叟

安成有隱士云是高密後治生實非貧而自稱貧叟問叟所以  
貧叟言不自知人皆富生產我獨富詩書問富數畜對叟惟數

道德所富不在財仁義廣儲積儲積能潤身此翁原不貧乃知  
多寶者無德真貧人

秋懷

偶讀唐文粹張曲江秋懷詩中有宦成名不立志在  
歲已馳之句有感于心因次其韻

秋風起天末木葉辭故枝泛觀草木性消息理可知緬懷先哲  
言志在歲已馳業業慎永圖深恐有所疵流光日荏苒隙駒去  
難羈血氣漸覺衰境變志亦移終爲小人歸甘與世俗隨嗟言  
道無窮孰云生有涯雲松高天矯霜草寒披離人生在所處卑  
卑徒爾爲

草木忽變衰側然感我心鳥飛日向暮豈不懷故林閱人日已  
多涉世日以深高官世所慕直道古所欽青青海中山層層山  
上岑行行即可到決意須在今有山不歸去何勞憶山吟

送劉紹和還南京

交游徧寰宇契合無幾人駸駸入老境落落星任辰鼎  
百年間會晤能幾旬况復限區域世務縈其身久別喜相見見踈情  
轉親俄頃又復去寧不含酸辛緬懷古賢哲未必生同辰道同  
心自契千里如比鄰溶溶天上月湛湛空中雲舉目即見之光  
景常如新

朱文公九世孫挺初授五經博士歸建安

宣尼去世遠六籍日以湮道統久墜地人文孰昭陳至哉紫陽  
翁妙契古聖神遠沂洙泗流近追濂洛塵一洗千古陋再見三

代淳坐令宇宙內百世同一春

兀坐有感

兀坐一室中蕩蕩天地寬坐看百世上宛在瞬息間開眼無聞  
滿身如生翰頓然忽有悟不覺喟然嘆女織為我衣男耕為  
我食豈但我一身全家賴資給我身乃大蠹何以報天德

文江王文學輓章

茫茫宇宙內山林多隱淪白首抱幽獨沒世志莫伸所以高蹈  
往往增悲辛寧知造化理得失恒相因在生雖不遇後嗣多  
有聞父子本同體何必親其身請看芥水翁肥遯文江濱幸哉  
有賢子委質為王臣生有冠袂榮死有銘述文耿耿不亡者沾  
然長獨存

送吳旦赴南康文學

匡廬古名邦山水多幽勝香爐生紫烟彭蠡涵明鏡民淳風俗  
古地僻翼塵靜昔賢過化處草木皆可敬橫經講道餘無事一  
游泳

游泳何所適白鹿有遺基近聞鄉先達起廢重構之突兀有新  
宇剝落多古碑千載紫陽翁重訓留明規古稱敦學半曰此以  
為師勗哉毋自畫賢聖皆人為白鹿書院文公先生守南康時  
聚徒讀書其中近聞潮陽李景

為起廢故詩中及之

題古康三洲巖

羣山勢龍從一穴空豁豁滴乳成物象峭壁繡鮮花土鼓有函  
音丹竈無遺砂誰云蓬萊洲此名殊不佳我來恣清賞疑是古

仙家惜哉奇絕景落此窮海涯模寫不能盡歸去鳳池誇歲甲午予

游三洲巖詢其所以名或曰郡志謂以蓬萊山之第三洲得名語殊不經此巖天造地設瑰奇不可名狀因與郡守黃庭美議易其名曰古仙作詩識之

### 送林郎中致仕

羣飛方刺天冥鴻獨長征一朝捐其群閔然去無聲引領四望之海闊天宇清憶昔隨陽日乘時共和鳴贊以獻諸君漸以儀于廷云胡別我去奮飛不復停我亦有兩翼蹠屬猶地行仰天逆風呼心馳身未能乾坤何茫茫世務恒營營至竟無了時何者為稱情天以老為佚人以退為榮幸免官為家况有田可耕君閑興趣便心靜思虛屏游心太古初玩味羲皇經著書明大道哦詩歌太平老我有此志將欲接武興相期堅晚節庶不枉

此生

### 題畫為柯狀元乃尊作

幽人事佳遯開軒對陽明興來拂瑤軫暢我平生情心中有真趣指下無繁聲上弦叶風薰下絃諧鳳鳴坐覺冲襟開塵滓頓以清紛紛濁世中入耳皆琴箏何當謝塵務枕流階下聽古琴端居閱古編雅服稱峻儒清晨掩闕誦乙夜猶伊吾靜觀天人妙遠泝洪荒初匪徒掇其英亦以味道腴繼世有賢嗣一目五行俱父積子能讀因之見慶餘右書

### 題畫為蕭考功作

愛此春山秀微雲淡悠悠蒼松俯深澗翠篠媚清流結屋者誰子獨占雲山幽抱琴循側迳引領仍歸舟歸舟天際來何時經

丹丘丹丘多羽人為問相見不右春景

入夏草木長林壑迴幽雅雲際川光浮石罅巖溜瀉誰當三伏

中高會江亭下倚席和絳歌縱目極平野鷗波浩蕩間羨彼舟

游者臨淵空有言結網人何寡右夏景

書白牛圖後

我本農家子兒時曾作牧倒騎牛背上簑笠吹橫竹老大客京  
國久不見此畜忽然覩斯圖心若有所觸泛觀天下物無物似  
牛犢既以拽犁耙又用轉車轂為我運百貨為我生百穀論力  
亦莫比論苦亦良酷云胡世上人甘心肆口腹既然食其力何  
忍食其肉水陸珍百品物物可充欲孟子有遺言不忍其觫觫

題竹送高博士使高麗

青旌懸翠旄龍竿綴鳳尾持出

大明宮搖搖向東指氣節橫九秋風聲揚萬里坐使三韓人快

觀古君子

敬所為蔣敬之作

古人敬作所日夕處其中出入與起居恒與此所同居憇以為  
室游寓以為邸行於此中行止向此中止莊誦敬夫銘服膺晦  
翁箴非徒所其身將以所其心心在此所所至如戴天惺惺  
重惺惺白首相周旋

弘治初元春二月十五日

皇上躬耕籍田臣濬叨在九卿之列預行九推禮感而有作

我本農家子世業在犁鋤生來好詩禮舍農去為儒筆墨其未

相經籍乃蓄畬脫迹田舍中致身承明廬日食大倉米八瓊頒  
天厨不知稼穡艱豈解耕耨劬云胡七十年乃尔復其初

謾成

夕陽昨陰翳朝陽還繼升萬物被輝燿炎光正熒熒浮雲起咫尺  
白晝仍冥冥世無駐景戈空懷百尺繩

擬古樂府

公莫舞

公莫舞公莫舞不必區區聽亞父霸王百行掃地空不殺一端  
差可取咸陽宮殿成劫灰三秦城邑衝殺機云何居鄴七十叟  
不及外黃黃口兒公莫舞公莫舞公舞徒爲爾天命由來歸有  
德不在沛公生與死

採蓮曲

蓮花紅蓮葉碧紅似妾容粧碧如妾裙色輕紅易落碧易衰情  
人道來竟不來停橈轉棹日過午藕絲斷盡蓮心苦

搗衣曲

已巳冬寓  
北京作

涼飈透窓紗蕭蕭弄秋色妾在江南尚不堪况君遠在陰山北  
風吹妾身寒妾念君衣單起來搗衣明月下不辭膂力摧心肝  
一聲孤悶添兩聲雙淚墮三聲四聲情轉多無數離愁滾碧波  
須臾搗到千萬聲中有萬恨千秋并不知遊子在萬里今夜魂  
神寧不寧

短歌行

一日生一日落明日不如今今日不如昨短歌行聲苦惡人生

行樂湏及時腰纏何必揚州鶴

花游篇和楊廉夫韻

雲樓霧閣深濛濛弱流萬丈號天風姓名久注丹臺裡浮槎直  
泛銀河水凌空八翼飛天門若木不賈蛟綃裊天衢空闊舒禹  
步俯瞰人寰惜丘墓一聲鐺笛自天來擬借重湖爲酒杯玳珠  
落槽冰在椀霧閣歌唇玉奴板天邊一任烏輪西拂塵掃石題  
復題鸞儔鳳侶隨蝶使爛熳芳遊日三四醉揮彩筆掃雲箋談  
寫遊神八極篇

綠珠行

交州使者洛陽客白日劫商富財帛金鞍寶馬擁旌旄萬里南  
行日南國征車曉過古白州江山秀麗多嬌柔不惜明珠三十

斗買得佳人如莫愁歸來金谷園中住鎮日張筵盛歌舞手心  
擎出夜光玳回視羣姬等泥土四時行樂春復春懽笑不知天  
有晨豈知我愛人亦愛側邊已有窺伺人鴛生地底中台拆白  
晝中原行地蝕黃金無用錢不神欲庇婢始苦無策高樓重重  
舞且歌樂思何如憂思多按首索駿期必得珠兮珠兮柰爾何  
柰爾何爲爾死思愛誰知止於此忍教白壁屬他人注目相看  
淚如洗君以貌愛妾妾以心事君寧在君前死爲鬼不向賊邊  
生作人百尺樓頭不見地奮身一躍翻空墜三斛明珠易一珠  
一朝紛紛如粉碎誰知荒僻山海涯天亦生此明媚姿不獨貌  
妍心亦正嗚呼但恨不似後來金源氏之葛王妃

登高丘而望遠海



登高丘望遠海身居崐壘間日極蒼茫外神游八表縱大觀氣  
噓千丈發長慨直從混沌鑿破初大徧虛空無盡界天於子會  
開一元地自海隅分兩戒山萬重水千派神禹勞勞躬四載野  
外脩途七聖迷海上神仙六齧戴波濤洶洶泛蒼溟沙漠茫茫  
連紫塞豈不欲鼓袪登瀛洲却愁弱水難勝芥豈不欲振策赴  
瑤池恨無神駿能歷塊不如振衣千仞固老眼空明無障礙近  
山列翠屏遠山林青黛太華三峯勢若蹲黃河九曲流如帶舜  
功封濬四海同禹蹟平成萬世賴三十六洞天處處藏神恠七  
十二福地一一異姿態驅山走海入雙瞳咀今嚼古供一噉山  
嶽降神生異材景物因人成勝槩安期竟不來漢武空相待硯  
山依舊存杜子今安在掛劍殊非昔日墳釣魚乃是今時瀨赤

壁人尋折戟磨浯溪客打殘碑賣往古來今倏成忽敗物理不

齊時光難再扶世教者何人歷變故兮幾代古蹟日已湮昔人

日已邁瓊樓玉宇不勝寒民墮顛崖苦凋瘵重衾春煖夢無魚

破釜塵生色如菜口談詩禮半盜儒醉擁韜鈴多債帥借時感

事氣填膺以手撫摩聊一噫君不見地為輿天為蓋人在其間

稊米大分明芥子納須彌毛孔真能容渤澥逐日何須隨夸父

步地誰云有章亥請學尼丘古聖神越過東山登泰岱客有繪

遠圖獻鄉先達太司徒薛公悅  
遠者故即古樂府以為賦此

梁父吟丁未歲十月

浩歌梁父吟視古猶視今世態屢翻覆人心益崎嶇爭名競利  
日無已龍蛇走陸波濤起設謀毋慮千萬桃殺人豈但二三子

來今往古何憧憧小人心志今古同君不見張道濟嗾趙彥昭  
又不見李文饒拔白敏中實當不祥公竊位不畏天命悲人窮  
梁父吟用意深卧龍久已矣謫仙亦銷沉以我今日見寄之前  
古音

七言古詩

濁海歌 少作

天下百川皆清漪一流入海便成緇洋洋不復辨涇渭混混孰  
與論滄溟洪濤巨浪轟轟怒不覺已身如穢瓠看來何似山下  
泉清香凜冽爲人慕我向潮頭三歎息志欲澄清勢未及願言  
上帝檄天吳一夜黑波便成碧

讀東坡詩

東坡居士真天人文章豪邁如有神光焰豈但長萬丈筆端真  
可幹千鈞萬斛源泉隨地滾玉盤明珠無定準瑯國夫人控五  
驄淡掃娥眉却脂粉風霆翕歛一時來滄史雨霽烟雲開虹收  
霓戢星斗爛一天明月光昭回此翁落落不可得謫仙少陵乃  
其匹小兒淮海秦少游大兒豫章黃魯直前生自是末禪師後  
學宜稱韓退之玉堂金蓮不足貴羅浮瓊海真瑰奇誰云賦詩  
不中和餘子碌碌真么麼眉山至今草木枯五百年來生一箇  
海南遺迹有雙泉我家依約雙泉邊雙泉湮沒不可見山城落  
日生雲烟

題李將軍四時行樂圖

日華淡淡雲陰薄兵衛森森擁鈴閣旌旗不動柳風輕劔戟無

聲花雨落將軍新試越羅衣兩袖春風拂地垂閱遍三軍超距  
樂晚涼乘興諫歌歸春游細柳

松風流響團涼影翠薄翻空火雲冷一軍無事枕戈眠萬馬不  
嘶清晝未將軍燕坐凝清香靜對珠鈴萬慮忘不用更揮諸葛  
羽溶溶心月自生涼夏坐松林

霜染楓林秋氣蕭涼水收痕山露骨狼烽一夜化為鷹百鳥含  
羞傍林麓將軍小隊出西郊金環玉勒青驄驕鳴彈一聲軍吏  
賀半空雲外落雙雕秋郊挾彈

凍雲不飛朔風直野獸畏寒出還沒角弓鳴箭起蟲飛霜鋤吐  
芒驚鬼哭將軍自控五花驄翩翩雲騎爭追從射殺南山白額  
虎碧油幢底夜論功冬野行圍

雲山清趣圖為歐道人作

山矗矗雲漫漫雲容山色微茫間一天淡月秋空靜滿地落花  
春雨寒道人愛此有清趣穿雲結屋依山住一縷茶烟午夢餘  
兩腋清風欲飛去欲飛不飛無限情拂絃時作太古聲驚猿叫  
月淚潛墮老鶴知更相和鳴夜深萬境俱岑寂兀然虛室時生  
白回頭人世隔紅塵雲山慘淡無顏色

嚴子陵圖

長吟劉歆頭不及嚴陵足厥角稽首勢若崩况敢橫足加帝腹  
嚴先生何壯哉釣臺豈但高雲臺清風遼邈一萬古落日頽波  
挽不回

歲丁卯過采石吊李白

采石江頭黃土一杯東有蛾眉亭西有謫仙樓謫仙仙去不復  
返惟有江水日夜流人生一世幾何久不如眼前一杯酒飢來  
文字不堪食死後虛名竟何有請君看此李謫仙掀揭宇宙聲  
轟然長安市上眠不足長來采石江頭眠百世光陰一大夢衾  
天枕地無人共寧知浩浩長江流不是醴丘春酒甕此翁自是  
太白精星月自合相隨行當時落水非失脚直駕長鯨歸紫清  
至人雖死神不滅終古長庚伴明月

送伍天錫

天錫掉頭歌且吁拔劍斫地呼烏烏酒酣興逸雙耳熱仰天舉  
手長盧胡斯人豈是噲等伍磊磊落落非凡夫豪梁五車不足  
讀取黃妃白羞拘拘長江一瀉千萬里雲濤變幻時有無鄧林  
掀天白日動春風著物枯槁甦丈夫卓犖有如此置身合在承  
明廬年來一擲金注拙日光五色成糝糊無人爲薦阿房五舉  
世空仰靈光孤一朝得係聖賢籍携經載道之荆湖渠渠高堂  
據中席說說英俊趨座隅鈎玄慕要說道義魏冠大帶談唐虞  
名教由來有真樂功名富貴皆土苴范金合土無躊躇不須北  
望生鬱紆

淮之水送淮安林馬判

淮之水清瀾瀾山陽古郡淮之渙逋仙之孫古君子似是馬曹  
官自理何以况之淮之水  
淮之水清徹底沮洳浸潤幾百里山陽太守差可擬一時僚佐  
皆肖似餘波漸漬良有以

哭年尚書

平生不曾受公恩亦復不曾登公門朝來聞人報公死不覺淚  
墮聲潛吞出門仰天長太息日色慘淡雲昏昏正色居然失一  
黯振落何用千公孫齊人之莩木非刃晉士之死猶不言居艱  
老人不得志氣結血滯心苑煩安昌坐待牖下盡晉江甘向池  
邊蹲攫肉千彈猶眷戀覽德一下俄高騫物情高下胡懸絕天  
理茫昧難究論公身雖死心不死巫陽不用招其魂上為日星  
麗層漢下為河岳亘厚坤人生百年等一死公乎千古名常存

岳王墳

我聞岳王之墳西湖上至今樹枝尚南向草木猶知表蓋臣君  
王乃爾崇奸相青衣行酒誰家親十年血戰為誰人忠飭翻見  
遭殺戮胡兒未必能忘秦嗚呼臣飛死臣俊喜臣浚無言世忠  
靡檜書夜報四太子臣構舟拜從此始

挽羅都御史

正統己巳北虜深入當道者建議趣召宣府總戎官  
率兵入衛京城或欲遂棄其城衆紛然爭就道時羅  
公為都御史巡撫其地乃毅然仗劔坐當門拒之且  
下令曰敢有出者手斬之衆遂定口外人至今能言  
之而脩宣府志者亦載其事公平生事業固多而此  
舉尤為卓偉抑菴先生作墓志略不及何也濟初來  
京師時嘗拜公於寓所極蒙獎諭及濟登朝公已  
致仕家居不久捐館舍矣辨杏致敬其道無由茲因

其躋鍾轅應貢來致其子泰命求挽章因次第完城  
事為韻語以補公志之略云

六飛北狩無消息邊城四望狼烟赤胡馬長驅去復來何人却  
建捐邊策鎮朔將軍生入關北門鎖鑰空餘鏃強兵健馬盡南  
走黃塵蔽日天漫漫白首憲臣南海客手持一劍當門立誓與  
孤城同死生怒髮衝冠氣千尺車輪生角馬駐蹄居人不動行  
人歸叱咤之間樓櫓具金城鍊壁湯為池雲州失守赤城破胡  
兒躡足城邊過老妻稚子盡登埤公亦援枹雪中坐山前山後  
無數城此城屹立如巨屏虜騎南來資扼塞王師北出恃屯營  
屏蔽京師功卓偉謾有長城長萬里江淮果賴張有源河朔  
僅餘顏御史憂國勞邊兩鬢霜事成乞骨歸故鄉肘金腰玉老

塞路無人上書訟陳湯一葉扁舟五湖水漲海邊頭亂山裹折  
簡不通朝貴書抱膝長吟聊尔尔羅浮山崩天墜星乾坤一夜  
收英靈公考生死已無愧邊人至今嗟未平邊人能言不能紀  
慚我鄉生官太史聊述人言作此詞書罷長歌泪如洗

海屋添籌壽徐助教

茫茫瀛海浩無津弱水無力勝纖塵中有仙山三萬八千里平  
地拔起凌蒼旻瓊臺玉宇金銀闕罡風盤旋舞香雪琪花不落  
瑤草芳天氣長如二三月朱橘如斗蓮如舟脯蒼麟兮駕紫虬  
木公金母互來往天鹿人鳥時嬰吻銀濤凝碧漫山麓山麓渠  
渠列華屋黃金布地玉為階五色雲霞長蓋覆屋中插架皆仙  
籌非金非木非琳球連櫺充棟十餘屋堆積高並崑崙丘山中

老人若童孺洗髓伐毛知幾度桑田變海海成田下得等來已  
無數仙境變幻無定居仙人綿邈不可呼誰知仙凡了不隔人  
中亦有列仙儒列仙之儒服仁義不乘風兮不御氣辟靡環水  
如道山衿佩趨庭總仙裔考古直遡盤古時積書多與桃核齊  
仁人自爾享遐壽海屋添籌徒爾爲

題山水圖

昔年棲迹雲林下舉頭見山不見畫如今置身朝市間開眼見  
畫如見山山耶畫耶孰真假具眼之人世間寡景福好處皆起  
樓趣到佳時急驅馬居山不見山中佳厭厭林壑輕烟霞一朝  
別山出城市黑風黃日昏塵沙廣庭曲巷通幽處壘石栽花脩  
勝具眼中彷彿雖逼真畢竟人爲靡天趣回思舊隱隔世間欲

見之千萬難殘縑斷素總咫尺傾囊倒篋不復慳君從何處得  
此幅千里雲山數間屋遠山淡淡橫翠眉近山亭亭削青玉山  
頭處處飛白雲樹頭樹尾晴輪囷丘林忽斷天光露暝色遙連  
雨氣昏蒼苔白石羊腸路平麓盤盤幾家住就中老人華陽巾  
手把瓊芝滴清露山光水色相渺綿漁舟泛月江吞天長風浩  
浩起天末高堂白日生雲烟興來却憶竹鶴老見畫何如見山  
好人生即景須盡歡尋仙何必蓬萊島

送張茂蘭黃自立二同年回南京

前年悼鞅翰墨場英雄三有齊翱翔青雲滿眼多契合就中最  
厚張與黃二君英發氣如虎明目掀眉論古今酒酣拂劍落霜  
花興發掃毫灑秋雨今年同自江東來我一見之心眼開長鯨

吸海海欲竭巨靈擘山山為摧摧山竭海懸河口風雲變化龍  
蛇走盤古以來二石二十餘萬年一一成敗興亡如指手相看  
一笑氣味投典衣沽酒鎮日留隣翁侍吏共驚訝平日見我曾  
有此客不此客何昂藏此主大癡絕牙關齟齬金聲口角霏  
霏灑瓊屑帝城春暖百花香軟紅塵土飛悠揚明朝馬首向東  
去燕雲一碧天茫茫燕雲不斷吳雲起兩京相望四千里桃葉  
渡頭生碧波清夢隨君渡江水

四友圖為安成劉進士秩之父作

三友竹松梅其間一友我萬物與人同一理意契神交無不可  
君不見見明月在天光在尊李白對影成三人又不見書酒琴棋  
集古錄醉翁與之合成六古人將身混物中游心太古窺鴻蒙  
此翁妙得古人意白首山林無物累每將富貴等浮雲却與幽  
真結深契左挹大夫袂右拍君子肩羅浮美人相後先翁居其  
間吟且嘯一笑相看同歲寒市道豈所論金石未為堅耐久且  
莫逆忘形更忘年

題李都督虎

陰風颼颼振林木百獸魂飛草木伏舉首為旗尾作旌白晝橫  
行誰敢觸汝虎雖猛何如人慎勿夜逢李將軍將軍射石尚沒  
羽薄肉淺毛何足數

送張端

纔見挾書來又見拂衣去出門大笑氣如虹聞海燕山如跬步  
男兒四海志婦人不下堂名駒墮地走千里生男三日垂蓬桑



功名富貴身外事得喪悲歡底須計君今歸去蚤歸來莫向山林久淹滯只今蒼頡茫昧伯喈亡待爾重刊石經字

懶詩為莆田許氏作

莆中有懶士踵門求懶詩君但懶於事我乃懶於辭君來索詩日數次我欲揮毫俄又廢看來我更懶於君所以深知懶中味懶中滋味人少知第一是閒次是睡古人何人最好閒陶令棄官江上還閑中却作閒情賦胡為屑屑不憚煩古人何人最好睡老搏翻身驢下墜睡餘却詠好睡歌無乃勞勞愛多事問君之懶何如哉曰吾喪我忘形骸過午枕頭方擁被一春屐齒不沾苔也不學莊叟逍遙游也不學龐老團采坐任他門外事如天管甚鄰家燈走火千呼萬喚絕欠伸十迴九轉難出門時人但見應世懶就裏誰知學道勤一年三百六日日十二時時八刻閉門搬運紫河車畢竟勤耶是懶耶

畫菜

世間食品何者佳淡中滋味真無加富客何須悅芻豢神仙謾爾飡烟霞聞君作縣官河側繞屋築畦供日食食餘手腹繞園行喜得邑民無此色

送嘉禾伍公矩歸桂林兼問訊海鹽張靖之

平生故人伍公矩少年學文今學武胸中豪氣老更豪境變情遷寧少沮酒酣耳熱歌烏烏手執如意擊玉壺興來投劍為我舞電光燐燼雲披敷仰天大噓回人語顧儂豈是噲等伍筆端一萬丈虹霓宵次三千歲古今憶年二十三十時風中快鶻囊

中錐廣寒紫桂白手斫滇池綠駿赤脚騎 奉天殿下丹墀底  
頃刻雲烟生滿紙璫林宴罷馬如飛一轡穿花三十里功名富  
貴皆等閑致身 承明殊不難覓得一州如斗大又被秋風摧  
紫蘭瑤簪玉筍山如畫靜倚韜鈴意閒暇堯山祠下拜放勳干  
羽兩階祈日化絳灌之武隋陸文令人未必下古人長籌入手  
一運轉溪山失險鬼不神李廣數竒顏駟老矜弓束書尋舊道  
英雄回首卽神仙忙處人多閒處少青天浩蕩雲渺茫吳山高  
兮粵水長南歸若見張給事引杯燒燭歌我送行章我亦頭顱  
如雪白每憶故人心惻惻明當歸棹過嘉興看劔檢書話疇昔

梅窻琴樂

高人好琴得天趣開窻靜對梅花樹江空歲晚夜深時丁丁似  
共南枝語淡香疎影太古音箇中樂趣清且深等閑三弄梅花  
曲花不在梅花在琴

題竹送湖廣湯僉憲

古來脩竹何處多鄠杜之間淇水阿填河落爛竹官廢但見土  
岸流渾波北風寂歷南風起千里飛青渡江水瀟湘兩岸遙相  
連班班盡染虞妃淚鷓鴣鳴時草不芳杜衡揭車總荒涼獨有  
此君不改色挺挺植立如人長顏雲壓頭低復舉細雨斜風任  
梳洗渭川豈但千戶侯孤竹誰云止二子君今持節騷人鄉眼  
中所見皆鸞凰清風明月有真境寫影何必勞玄香平生愛竹  
應成癖此日移栽近霜栢滿堂秋色寒蕭蕭一笑出門楚天碧

題松

蒼龍擎雲欲上天麟甲飛動頭軒然碧風吹海翠濤湧笙簫一  
派空中懸深山大壑無人到琥珀埋光兔絲槁家家束葦作屋  
楹未必長材此中老

十龍漱潤壽泰和封學士尹公

澄江江上逢原村村後仙巖高入雲蜿蜒神物久變化鄉人傳  
說名空存巖中空洞無塵土石壁流泉注如雨一泓碧玉清照  
人寒藻游魚澹容與白石爛爛泉涓涓泉不涸兮石常堅誰其  
肖之吉甫裔德潤九族壽千年屈指明年七十歲久矣

恩封因子貴侍講經幃未得歸即景分題寓深意十龍之景我  
所分祝公清潤還嶙峋崢嶸頭角長滿眼子如諸葛孫如荀

題童志昂都憲蠶叢國送其再使蜀

蠶叢之國妖氛生羽書雜還來天庭九重天子赫然怒咨讜  
可使西南征虎頭將軍攘臂起怒髮衝冠爭裂臂長鎗大劍置  
不問竭來獨運毛錐子毛錐子藏鋒鋠貯雲含霧飛電光鋼刀  
百鍊非不利銳矛八尺空自長螭坳當日曾簪白纓血流丹今  
變赤捫參歷井掃挽捨坐使岷峨迴秀色却笑漢家功業卑臨  
叩天子騰虛辭唐蒙已通馭中道嗷嗷筆舌將奚爲何如此日  
功尤偉赤子弄兵潢池裏輕裘緩帶笑指揮曳帛書功報  
天子平地誰知有伏機中山篋書終致疑張嬰就擒膝撫黜古  
來往事多如斯外境息來專內養徃古來今閉俯仰邊機事動  
問陳湯袍鼓聲聞起張敞劔閣戡戡棧道連高樓百尺仍筆邊  
君不見積功滿千簡上玄英雄回首即神仙

五言絕句

客中對月

萬里思歸客，傷心對月華。  
願憑今夜影，回照故園花。

中秋有感

客裏逢秋景，思鄉倍愴神。  
依然今夜月，不是去年人。

山居晚宿

地僻夜沉沉，愁雲結暝陰。  
隔林燈火起，照見並棲禽。

題扇面上小景寄鄉友

遠樹平連野，微雲低度山。  
黃龍青雀艦，不似釣舟閑。

明妃曲

塞雪凋宮鬢，胡霜裂漢裙。  
畫工雖可恨，不似奉春君。

宣和遺墨

雪暗紇千山，凍雀飛不去。  
何似南飛鳥，月明猶繞樹。

拜月圖

新月初上天，焚香拜且告。  
拜到月圓時，行人應解到。

閨怨

歲暮風霜勁，路長山水多。  
聞郎駕船去，願作楚江波。

聞鴈

越客不識鴈，聞之心輒悲。  
自憐長作客，不似鳥知時。

秋風

客裏渾無賴，樹頭俄有聲。  
倚窗頻側耳，無恨故鄉情。

自君之出矣

自君之出矣粧鏡暗塵生妾心似君影隨處逐身行

解嘲五絕

南人登宰輔首自由江公江浙甌閩士彬彬起繼蹤南士唐以前未有以

文入相者有之始曲江張九齡

唐士倫魁選南儂未著名道侔伊呂後開建有宣卿南士唐以前未有中

狀元者有之自開建宣卿始

禪教來中國始終由嶺南千年衣鉢在四海遠來叅禪教始自達磨航海

至廣州相傳至黃梅新興盧能復得衣鉢南歸

炎海生翁仲脩然如許長誰云駱越產體貌少能揚翁仲交州人

白水孕明珠一顆當三斛遠過漢明妃生長巫山麓綠珠博白縣人

夜行郊外

四際星垂野微霄與地連恍疑天盡處近隔樹林邊

送蔣敬之歸省和宋先生送方正學韻四首

文章有大家制作稱妙手欲知為文法如造內法酒

叮嚀出我口妙契在汝心愛身如愛玉受言如受金

試金當以礪磨玉湏用沙春融冰化水日暎雲成霞

老我悼無傳賴汝以解憂我有百車貨寄汝萬斛舟

五言律詩

村行

萬里勞行役驅車趁晚晴鴉邊殘照遠雨外斷虹明山徑高低路村春遠近聲隔林人語寂一犬吠相迎

幽居

郭外幽居好橋邊小徑斜紅飄桐井葉黃落菜園花淺淺浴鳧  
水團團宿鷺沙板扉青布旆記取舊東家

晚泊

風定帆初落籬根泊晚晴寒潮隨月上秋水共天清隔竹見燈  
影橫江聞鶴聲有懷秋不寐坐數驛樓更

夜到山庄

草徑直穿園溪流曲繞田村春應谷響炊火散林煙雨過池添  
水雲開樹露顛王翁聞犬吠迎客出門前

挽全州蔣隱君友人蔣良之父

高人厭世氛一夕歛天真花落閒庭晚鳥啼空谷春藥囊餘舊  
劑茶竈冷香塵埋玉湘江上悲風起白蘋

寄題金山寺

岷江萬里下梵刹半空開吳樹風吹斷淮山水蕩迴潮聲雜鍾  
磬波影動樓臺千載張公子題詩會再來

人日有懷

七日逢人好三年作客賒塞雲晴度鴈城日曉翻鴉雪化經冬  
水梅開隔歲花欲歸歸不得惆悵惜年華

早朝

落月傍西山初開虎豹關銅壺龍滴水朱戶獸銜環玉珮趨馳  
道爐烟拂近班去天纔咫尺不敢望龍顏  
曙色催仙仗祥光繞禁闈門開雙象峙鍾動萬鴉飛江漢宗滄  
海星辰拱紫微踈愚亦何幸每日近清輝

都下逢友人問訊

京國忽相見，蒼茫問起居。如何三載別，不寄一行書。共訝鬢毛改，自憐生計疎。故人應遲我，未得賦歸歎。

題空上人方丈

地僻少風塵，僧居卧隱淪。烟霞方外境，水月定中身。長日飯留客，夕陽鐘送人。它年如結社，還許醉相親。

秋日寄友

雲海懽游地，別來今幾何。壯心隨日減，歸思入秋多。細雨滋蒼蘚，寒風剪敗荷。有懷誰與共，搔首短長歌。

雨中有懷丁丑六月

風雨晝冥冥，閑愁不自寧。只宜長日醉，何可片時醒。花落隔簾數鳥啼，欹枕聽願言。頭蚤白歸去，候農星。

劉宣化學士挽章

明月蝕東壁，文星落北門。英靈還海岳，聲譽在乾坤。道德今劉向，風騷古屈原。百年公論定，褒卹荷君恩。

送人還鄉

年年京國裏，日日送行頻。又別海南客，重思堂上親。輿圖垂盡地，江海獨歸人。爲報吾兄道，官居只舊貧。

秋晚答友人

朝罷歸常早，官閑客自稀。少書隨處借，多病與時違。訪舊憐俱老，逢人厭說歸。傷心秋又暮，未寄北堂衣。

洞庭圖

八月湖面闊天低地盡浮四山通潦水萬景聚重樓木杪仙人  
過雲中帝女游何時乘雅興徙倚豁吟眸

甲午除夕

去歲當今夜停車寓古恩今年在京邸明日拜天門把酒懷兒  
女連林念弟昆家鄉千萬里注想黯銷魂

瓊臺會稿卷之十一

新建生員戴士民校正

瓊臺會稿卷之十二

瓊山丘文莊公濬著

五言律詩

瓊山少作

環海三千里珠崖第一山名馳四海內秀出萬峰間月下森瑤  
簡風前振珮環孤高尤潤澤蠟屐未容攀

過峽山飛來寺

三過飛來寺今朝始一登恍疑山是客頓悟我曾僧鍾響出幽  
壑猿聲啼古藤本無來與去明日問南能

穀日

入春纔八日無日不晴明歲有豐登兆人懷喜悅情物皆安物



性吾亦樂吾生對景題詩句遙傷杜老情

輓遼東都帥

聞說遼東帥安邊屢有聲烽煙稀夜警部落競春耕共悼營星  
殞空餘塞月明幾多門下士流涕濕長纓

輓廖監正

隨駕亡口外

久總義和職深明甘石經微雲纔薄日遠海竟沉星虎旅神旂  
折龍門鬼燐青靈臺舊知己含淚誦碑銘

輓金尚書

聖主中興日名臣獨數公鬢因憂國白計為愛民窮物議終難  
掩軍儲不自克有身嗟莫贖誰復繼尚蹤

送謫宦者過還揚州

曉日都門道西風酒一卮幾年悲玉後萬里賜環時古木前朝  
寺殘花后主祠淮南風景好歸棹莫教遲

送韓敬夫下第因東同志王璠

憐君失意去一笑拆垂楊老劍閑霜鏘新詩重錦囊人歸盤谷  
遠山遶太行長好約王摩詰來薰漢殿香

送朱忱之弟

南人不識雪况此北風吹桑梓久違後弟兄相見時歸雲孤度  
影老樹短垂枝一別又萬里重來未有期

輓毛都督

一代知名將三邊屢建功

帝憐何力義人比稔侯忠異鳥鳴牙上盤蛇墮鏡中九原終不

作大樹起悲風

送梁叔方行人養病還嶺南

使節行初返

君恩許暫還聊為六月息且得幾年閑白繞飛雲舍青連過海山自憐家更遠臨別憶鄉關

梅溪處士輓章

惆悵清溪上梅飄雪後枝茶烟無鶴避梁月有人思披覽經行處巡簷索笑時空餘陳迹在風雨草離離

即事 戊申

豈有隨時能常懷隔世憂許身徒稷契知己却孫劉海上孤飛燕沙頭决去鷗歛將經世志終老向菟裘

五言排律

李布政顯旌異卷

歲庚辰旌異天下朝覲官十人賜宴及衣服

萬國朝王日三年述職春乾坤開泰運岳牧賀昌辰期會逢千載褒嘉僅十臣

天顏臨下赫 聖語為民諄魚藻歌王在龍光荷 帝仁賜衣

明黼黻尚食出珍醇金縷盤銀鶴鸞刀擘玉麟賓筵張錦綺仙樂奏韶鈞共載雷雲厚親承湛露均 朝廷旌有德臣庶愧無

因豈是恩偏厚由來治最循一方勞撫字九德克忱恂匪懈勛庸著無華烟幅真姓名書 國史風采動朝紳品藻才猷異丹

青春顧頻暫教還外服行見據通津有美山東牧同為嶺表人

寸心願為國餘惠尚留閩新政孚青社先聲達 紫宸

上方期汝作詔再許于旬日下辭  
丹旻天邊候皂輪此行應  
不久四海待陶甄

寄題南華寺大鑿禪師

佛法東門且禪宗肇嶺南一溪香氣水萬縷藕絲衫結子花開  
五先人棗示三心燈受弘忍梵派演瞿曇山頂青螺聳波心碧  
玉漱衆流歸大海孤月印寒潭藹藹花雲煖灑灑法露甘未迴  
烟水棹空費葛藤談奏樂皇岡石讀書張相岩也知祖堂近無  
暇一登叅

七言絕句

過梅關題張丞相廟

平生夢想曲江公五百年來間氣鍾行客不知經世業徃來惟

羨道傍松

題希夷長睡圖

墜驢大笑便歸山衾枕乾坤分外寬一汴二杭闕又廣依然春  
夢未曾闌

春閨怨 少作

春雨池塘草發芽春風庭院柳飛花韶光尚有歸時節何事遊  
人未到家

舊歲花殘今又開去年人去幾曾來不知明歲花時節人在天  
涯回未回

花徑

春滿長安富貴家淺紅深碧競豪華書生掃地開三徑只種忠

花與弄花

閑來無事學栽花每日朝回玩物華不是偷閑作時態要分春意到貧家

題李閣老愛竹軒

軒外青青自作林暖風和日散清陰閑來坐玩中虛象契得羲皇畫卦心

先生愛竹異常情不為清陰與妙聲應似瀟溪窗外草滿庭青翠自生生

王抑菴尚書挽詩

秘閣當年應列星凌晨惟見一參橫澄江落入天低處耿耿寒光伴月明

十月見菊

淺紅淡白間深黃簇簇新粧陣陣香無限枝頭好顏色可憐開不為重陽

竹軒

種得幽篁傍小軒每依清影酌芳尊春風不惜階苔破願汝多多長子孫

題小景

石橋流碧水潺湲千樹桃花萬壘山謾道仙家有靈藥看來終不似人間

書所見

錦衣公子氣翩翩老去心情尚少年笑折海棠呼酒飲醉來猶

自戴花眠

望屠庸關

千里坡陀亘厚坤龍蟠鳳翥虎踞蹲青山也恐夷侵夏疊七層  
層護北門

過某氏園亭有感

危牆荐棘鎖重關不許遊人取次攀一夜西風零落盡牛羊成  
隊下空山

馬

天生駿骨異尋常午夜房星照地光冀北隴西搜索偏歸來內  
苑有飛黃

題程多實尚書晴洲卷

二水中分未是奇萋萋芳草亦奚爲何如司馬程休父一片晴  
洲到處隨

宛宛芳洲臨水濱起時歸老理絲綸世人莫作蟠溪看不是官  
年待載人

爲徐尚賓乃尊題竹

勁節高標不世情此君真似此翁清一枝分作虞庭用編入簫  
韶作鳳鳴

題墨梅

老龍半夜飛下天蜿蜒斜立瑤階裏玉鱗萬點一齊開疑雲不  
流月如水

過會通河有感

清江浦上臨清閘，簫鼓叢祠飽餒餒。餘幾度會通河上，過更無人說宋尚書。

松月

素娥夜駕玉蟾蜍，來訪雲亭五六夫。十里人家拾驚訝，老龍擎出夜明珠。

戲答友人論詩

吐語操辭不用奇，風行水上繭抽絲。眼前景物口頭語，便是詩家絕妙辭。

詠史

奇貨暗居南國楚，長城苦備北邊胡。秦人本意思黔首，畢竟誰知是自愚。

萬人叢裏擊龍車，說道民愚却不愚。天下箇編焚毀盡，瓦橋依舊有遺書。

題紅梅

淡竹幽姿絕點埃，乾坤間氣幻生來。花神昨赴瑤池宴，一夜春風與胎。

清姿元自玉為容，一餌仙丹便不同。怪得風標異凡品，托根今在藥珠宮。

素心的的結成丹，節操依然耐歲寒。他日調羹如見用，故家風味一般酸。

題竹送鄉生還教本郡

此君生長海南村，還自敷陰莖本根。莫道風聲聞不遠，年年春

雨長龍孫

題夏卿竹

白髮蕭蕭老奉常掛冠歸卧水雲鄉胸中千畝烟霞趣尺素能如萬丈長

王初陽尚書致政家居以姚少師道餘錄見示欲予為之分析書此復之

儒生不讀佛家書道本無虧豈有餘請問前朝劉太保西來作  
用竟何如

寄題曲江張丞相祠堂

嶺海千年第一人一時功業迥無倫江南入相從公始袞袞諸  
賢繼後塵南方人在公前無為相者

伊尹興商呂佐周匡時有道孰能侔誰知嶺表千年後公向中  
州出一頭公應道侔伊呂科

英英氣節蓋中朝風度嚴凝竦百僚嶺表因公增勝饒溪山無  
瘴路非遙

孤燕遙從海上來乘春偶見上堂開前身自是天庭鶴挾兔饒  
鷗却浪猜公有海燕詩一鷗挾兩兔見李林甫傳

身似冥鴻氣似龍紛紛群小溷中丞荊州長史今從祀誰問函  
公與晉公函公牛仙客晉公李林甫

漁陽鞞鼓擁豬龍萬里君王老蜀中羯虜果如夷甫料始知曲  
突徙薪功豬龍安祿山玄宗謂公無以王衍知石勒

玄都觀裏詠桃人剛道公家絕後昆請問宋朝追錄者韶州文

學是誰孫劉禹錫作詩

五嶺名宗首說張始從燕國得明揚一支分作錦溪水直溯淵

源到洛陽公與張說通譜張南軒公弟九臯後

七言律詩

五指參天

少時曾作瓊臺八景郡侯程公已刻之梓今不復存  
惟記其首一章謾錄于此

五峯如指翠相連撐起炎州半壁天夜盥銀河摘星斗朝採碧  
落弄雲烟雨餘玉筍空中現月出明珠掌上懸豈是巨靈伸一  
臂遙從海外數中原

送趙公子還蜀

柳花飛白綴征袍擊筑酣歌別思豪老氣逼人雙劍古好風送  
客一帆高五湖烟水歸程遠三峽雲山入夢勞別後相逢更何  
處引杯燒燭論龍韜

主一齋為陳敬作

沉沉天宇定生光人得心齋已坐忘學奕幾曾思射鵠挾書爭  
肯更忘羊靈臺有竅春常滿止水無波晝不揚好把敬箴書座  
右常如先正在羨墻以上俱少作

春陰

一春長是晝昏昏景色三分減二分別院飛鶯衝宿霧遙空歸  
鴈斗重雲踏花庭畔難尋影隨柳江邊不覺曛天意似晴還似  
雨擬將早晚問東君



寄張鍊師

辭家學道入青冥  
曉汲清泉書斲苓  
衣染春雲同鶴色  
劍涵秋水帶龍腥  
吟成白雪風生席  
歌徹青天月在庭  
幾度緘書寄仙侶  
蓬萊空闊隔滄溟

多景樓

多景樓前景致多  
倚欄吟眺奈愁何  
浮雲京國生春暝  
落日鄉關起暮波  
浩蕩乾坤心共遠  
蹉跎歲月鬢空皤  
醉來擊碎玉如意  
仰面看天發浩歌

金陵卽事

六朝城闕久蒿萊  
紫蓋黃旌帝運開  
鷓鴣漏傳雲外觀  
鳳凰簫奏月中臺  
千峯山勢連吳遠

萬里江流自蜀來

此日江南非昔比  
子山詞賦莫興哀

辛未歲過揚州懷古

秋風歸棹倚蕪城  
一片閑情對月明  
錦纜起鷗傷往事  
青錢誇鶴笑狂生  
吳公塘路已陳迹  
石主觀花空有名  
欲訪平山舊闌檻  
有無山色暮雲橫

歲庚午來自金臺  
寓新河有金陵卽事之作  
明年復至因觀高槎軒詩  
不意暗與之合有如剽竊然  
初實不知也用廣其意爲雜詠  
二首云

雲中雙闕俯秦淮  
天外三山對鳳臺  
二水合流趨海去  
六峯飛翠過江來  
金陵王氣千年盛  
鍾阜晴雲五色開  
愧我才非班馬匹  
可能無賦奏蓬萊

父老依稀說六朝當時伯氣已全銷新亭別淚何須墮古井妖  
魂不可招瓜步客帆朝帶雨長干僧艇晚隨潮行人不用誇天  
塹南北興興終屬堯

和李子構都門春日韻

碧桃花底共鳴珂雲淡風柔氣候和輦路雨餘生嫩草官河水  
泮動微波近天樓閣逢春早向日園林得暖多我有新詞三百  
闋興來呼酒對君歌  
寶馬雕鞍白玉珂花雲淡蕩柳風和梵宮密密開金刹海子深  
深湛碧波郊外踏青遊客醉水邊修禊麗人多誰憐寂寞楊雄  
宅門巷無人自嘯歌

初讀書

中秘預備天下志書東陳宣之

五鳳樓頭八百鍾萬鴉飛動曉天紅玉繩影轉瓊階日金甌香  
生紫閣風奪錦文章清禁裡登瀛人物玉堂中回看人世仙凡  
隔弱水浮埃迥不同  
雲霧重重畫閣深微風不動晝愔愔詞垣依約連華蓋兵衛森  
嚴列羽林文石九層人步玉牙籤萬軸客紬金平生夢想登瀛  
選此日回翔愜素心

壽陳太常

大雅遺音久寂寥天教鳴世振詩騷千年瑞紱蒼麟角五色光  
生彩鳳毛銀漢昭回御月迥紫垣依約壽星高一杯不為遐齡  
祝風虎雲龍慶所遭

家世瓊山之下田村七月二十四日夜夢鬚頭童子問

予以村之所以名夢中作此詩答之覺而呼燈疾書于  
都城東之遠遊軒

瀛海中間別有天寧知我不是神仙請言六合虛空外曾見三  
皇混沌前玄圃麟洲非遠境延康龍漢未多年有人問我家居  
處朱橘金花滿下田

座中有搗箏者作白翎雀曲因話及元事口占此詩

胡運消沉漢道興  
輶車宵遁上城平  
興隆無復殘笙譜  
弊正誰知舊斧名  
起輦谷前駝馬迹  
居庸關外子規聲  
不堪亡國音猶在  
促數繁絃叫白翎

南京給事中童志昂和李商隱無題詩韻南京諸公多  
和之意盖有寓間出命予屬和予村學究也不能外

題以為詩姑詠史以復之

大雅無人繼古風  
周家轍迹一朝東  
越裳白雉音塵絕  
痛蜀金牛道路通  
烏首百年終不白  
宮烟三月尚餘紅  
淳風死去無回日  
天下紛紛類轉蓬

莫向鴻溝覓舊蹤  
一場春夢五更鍾  
也知賜醢緣情薄  
豈是分羹愛味濃  
萬里使槎來首宿  
半空仙掌出芙蓉  
濛濛黃霧連天起  
不見秦關百二重

一自洞仙入洛來  
天開草昧幾雲雷  
千年晉水飛龍起  
午夜周宮控鶴回  
山下玉環啼粉面  
嶺南金鏡憶良才  
繡袍華幘開金統  
真信人間有劫灰

紛紛國步谷艱難  
汗簡千年往事殘  
夾馬營中香氣散  
黃龍堆

上練翎乾金源運去讎方復起輦魂驚骨已寒日月齊肩終古見照天光彩萬方看

四大朝賀

唐人有早朝詩然多泛言者日日可用也

今制大朝賀三

萬壽聖節元日冬至其次則立春焉因作四詩以歌詠

盛禮各紀一時之事庶乎異於泛言者

天啓昌期五百年虹流電繞早開先歡聲萬口當天祝表目千通對御宣番國獻琛陳闕下圍官呈馬過階前微臣亦有千秋錄擬欲緘封進上天

右聖節

黃道天開第一朝萬邦述職觀

神堯春雲乍起依唐殿煖律初調協舜韶更始曆頒新歲月履端詩錫眾臣僚史官記注螭坳立試筆先書瑞雁條

右元旦

庭燎煌煌照殿光日當長至拜

君王天心合壁開天統國史書雲表國祥廣漠風生光藹藹

黃鍾律應樂洋洋履長共喜沾嘉慶萬口尚呼祝壽昌

右冬至

京尹先春進土牛百官趨賀拜

宸旒條風細細來天表旭日暉暉照殿頭緹室候灰通玉律辛盤賜餅雜瓊羞

右臣茂對維新日願布陽和遍九州

右立春

送李景齡江西提學二首

嶺南朝士似晨星眼底推公最老成  
深計每為天下慮清心不愛世間名  
半生宦蹟多文學四海交游總俊英  
鄉曲論心嗟獨厚臨分贈別若為情

文風此日盛江西臺閣求賢特見推  
列郡洗心瞻憲節諸生翹首待經師  
春風發育原無迹化雨滋榮正及時  
應有政行文教外佇看佳譽慰吾私

病起寫懷

寸心千里日懸懸歸計今秋又似前身  
似凍翎飛不去事如春蔓苦相纏  
還家路梗須浮海報國才疎只望年  
幾度可憐還自

笑羨魚何事屢臨淵

特廣西徭侵海北界道路不通

送陳緝熙修撰使高麗

海上天風吹節旄玉堂仙客錦宮袍  
詔頒龍闕恩初下詩到鷄林價倍高  
萬仞鼇金浮曉日一江鴨綠漲秋濤  
遠夷未識中原鳳爭觀文章五色毛

分得都門曉日送彭閣老歸省

承恩歸省出蓬萊曉日都門祖席開  
三足陽烏離海上九苞儀鳳下天來  
霞光流彩明宮錦雲氣浮香注玉盃  
此際道旁誰不羨幾人親在位三台

都城春日

宮闕巍巍紫氣高西山東去碧周遭  
天晴魚躍龍池藻春老鶯

含御苑桃映日暖雲流似水滄塵香雨潤如膏太平有象尋常  
醉不用金龜換濁醪

秋興 天順甲申

風掃長空積雨晴短柳疎柳亂蟬鳴沙頭鷗鳥尋常去江上  
蕪日夜生嘉樹有蹊荒鮮合好山無數斷雲橫却懷九曲餐霞  
客獨抱銀蟾遡紫清

秋風秋雨夜淒其凭几沉吟有所思驚鳥故投曾宿處開花還  
是已殘枝喜看淡月穿雲出靜數遊絲墮地遲萬里鄉心千古  
意興來聊誦少陵詩

舟次直沽簡彭彥實同寅

潞河澄澈衛河渾二水交流下海門直北回看龍闕近極東遙  
望蜃樓昏孤城近水舟多泊列戍分耕野盡屯我有好懷無處  
寫欲沽樽酒對君論

閑中有懷

燕山越嶺路迢迢意氣相逢即久要處處皆君共處朝朝朝  
是我同朝桂庭醉月依瓊樹柳館吟春縮翠條回首只今成老  
大秋風霜鬢共蕭蕭

書懷

攬鏡俄驚白髮新吾猶衰邁况吾親客邊每日營歸計海北何  
時息戰塵人世幾何能有歲客程無奈隔千津不堪點檢心中  
事萬種愁縈自病身

送將巡撫致仕還雷陽

蕭蕭白髮老參軍。此日休歸荷主恩。但願有官封父母，不妨無物遺兒孫。趨朝慣識天邊路，投老還尋海上村。遮莫相逢嘆衰暮，同袍回首幾人存。

送張城中書使朝鮮國

玉節煌煌照海東，羨君去意拂晴虹。鳳麟瑞世人爭覩，魚鱉成橋道自通天入。玄菟低沒鶻江浮，鴨綠澹蜚鴻。玆行喜從文章客，多少豪吟倡和同。

送王給事中使占城

銀漢清秋泛使槎，旂旄晴拂海東霞。扶桑水接南溟闊，析木天遙北斗斜。螭首衝風龍伯助，鳳毛瑞世島夷誇。皇明威德今無外，莫諱中朝第一家。

輓羽士

十二樓臺海月空，朝元人去藥珠宮。形銷勿作良非子，物化在成亡是公。玄牝養來神不死，庚桑過去歲尤豐。床頭一卷參同契，謾有彬彬萬遍功。

壽蕭通政之父七十

高隱澄江老歲華，待看朱雀長金花。錫名初度皇予揆，賜誥重封

帝汝嘉梓里，晝衣明皦日。藥宮春燕泛，流霞千年尚。祝椿年永七十餘齡，未足誇。

南歸經尚雷境有感

萬里歸來二十年，野花啼鳥亦蕭然。頻垣敗屋人何苦，剩水殘

山景可憐芳草路岐迷  
輶迹夕陽村落斷炊煙  
藍輿穩坐思前事却恨  
清談誤晉賢

蘇武歸朝圖

茂陵烟樹碧蕭疎白首  
生還志不渝面目依稀  
猶似昔節旄零落已無  
餘歸期不待羝生乳遠  
信真成鴈寄書頗有幽  
懷忘未寫夢魂時或到  
穹廬

運籌亭為韓都御史題

五嶺中間數仞亭海雲  
山月總關情三千帳下  
諸恙客十萬胸中小范  
兵談笑已看功業就指  
麾能使鬼神驚先憂後  
樂平生志須仗忠貞谷  
聖明

送祁至和即中使高麗

練鵲天書五色裁中原  
使者下天來白山綠水  
玄菟境玉佩瓊瑤綉  
虎才絕域喜沾新雨露  
遠人驚見古罇豐縣知  
不是乘槎客肯帶蒲萄  
首箱回

送王侍御赴江西僉憲

予昔在場屋時感故大  
司空慈溪王公鑒識於  
眾人中屈指今三十三年  
矣公既捐館舍幸與公  
冢子御史鑰同朝今有  
命憲江西之命於其行  
也追和公舊所賜詩韻  
以送之公詩併識于此  
五十名中第一人才華  
惟子足超倫經明禮樂  
行文健策對圖書究理  
真春榜英才角勝夜窓  
燈火莫辭頻從來顯達  
由稽事業輝煌在此辰



曾向薇垣拜儲名一時名勝更無倫雲龍矯矯機神異野鶴昂  
昂賞鑒真北海清尊傾瀉盡西州舊路感思頻喜看東閣即君  
貴接武蜚騰正及辰

子於學士莊中構堂名以瞻王取歐陽子語也四壁繪  
圖各印其景賦詩四章

玉堂春晝寂無譁咫尺天宮是帝家金屋瓊樓天上景琪林  
珠樹禁中花閑揮麟筆書青史細染龍香草白麻嶺海幾人曾  
到此他年回望渺天涯

校書天祿憶前賢太乙燃烈照簡編東壁圖書在人世北門學  
士即神仙龜文鳥篆千年具金薤琳琅萬軸懸他日歸休雲海  
上却從須女望蓬躔

鈴索無聲夜漏沉絲綸閣下靜悄悄宮袍香拂麒麟錦賜燭光  
分藹藹金五緯星明芒燁潤萬年枝老氣蕭森顧瞻他日如天  
上豫作新堂寄素心

西山落日半紅啣朝退聯鑣學士三萬點宮鴉丹禁表兩行  
官柳御橋南講筵應制詩新進曲宴承恩酒尚酣乞得身閑定  
何日人間回首隔仙凡

### 學士四榮

#### 史館進書

朝廷凡有纂修必救翰林院泣其事於實錄尤加重  
焉書成禮部定儀注以進進之日設鹵簿及樂於

#### 殿廷

上服衮冕御奉天殿百官朝服於丹墀內東西侍總裁  
官以下纂修官謄錄官俱朝服北面立鴻臚寺官以  
案捧

實錄由中道升班首隨其後至殿門外

上起立案至御前班首詣案前跪展書史官以下皆跪  
上觀畢內侍捧案入內

上復坐班首及諸史官俯伏興乃進表進訖百官行慶賀  
禮乃傳制曰

先帝功德配天紀述詳實朕心懽慶與卿等同之百官舞  
蹈山呼如儀明

賜宴于禮部賜襲衣白金其餘書史則止於便殿進

禮儀視此稍簡矣濬入翰林凡四預纂修成化三年  
八月二十四日

英廟實錄成隨禮部尚書兼翰林院學士陳文等進呈夫  
翰林之事莫重於此而進

實錄恩禮尤為優渥故以為四榮之首

一代人文已就編裝潢進入九重天禮官捧案陳階上閣老  
開函近御前文武侍朝喧九奏典章垂世詔千年厠名卷末  
真切骨愧乏三長似昔賢

經筵進講

經筵之設其講官以翰林院官充每月旬遇二日

上朝退御文華殿知經筵官及同知經筵官六尚書左右

都御史通政使大理卿國子祭酒翰林學士皆服緋袍分左右班侍其展書官及執事官立其後給事中御史各二員北面立講官每日輪二員先日具講章二前署直講官職名進入內臣以一置

御案一置講案至日各官行叩頭禮畢鴻臚寺官二人捧案至

御前二人捧講案寘殿正中鴻臚寺官唱進講翰林院展書官二員對立御案前稍南以次進跪案前展所講書鋪章其上用金界尺鎮之二講官詣講案前並叩頭起立展書講講畢合書復同叩頭退就班  
上命賜酒飯衆官齊聲承旨出就殿外叩頭退饗于左

順門畢北望叩頭謝

恩而退天順甲申八月二日

今上首開經筵時知經筵官太保會昌侯孫繼宗少保吏部尚書兼華蓋殿太學士李賢濟於是時叨充講官奉天朝罷日暉暉鳳輦東行御講帟五色龍光騰黼衣兩班獸錦絢緋衣敷揚帝典明如見對越天顏近不違共荷

聖恩親賜食相將霑醉出彤闈

奉天侍宴

凡太宴公侯駙馬伯及在京文臣四品以上武臣都督僉事以上文東武西侍坐殿上惟學士以五品

特坐西品上蓋

祖宗以此優禮文學之臣其餘次第宴中左中右二門及

丹墀內宴之日該宴官朝退即更衣立

奉天殿外俟

上至升座樂作入拜進花進酒跪俟

上飲訖乃起即席簪花啐酒如儀是時樂舞迭奏百戲呈

應酒凡九進湯五進群臣則殺其二

上屢命禮官滿酌俾群臣飲醕禮畢各官各以囊盛其餒

餘者携出澹以成化三年八月二十五日陞侍講學

士繼陞學士幸皆預焉

聖代崇儒禮數優特陪御宴殿東頭八玳厭飲恩波浴萬

舞回翔樂意周勸醕頻承丹宸詔餒餘親用福囊收遠方章

芥何多幸坐侍從容近冕旒

謹身讀卷

凡廷試禮部先期奏請讀卷官故事以命內閣及六

部都察院通政司大理寺正官而翰林院學士講讀

學士皆與焉試之明日

上御便殿次第進讀

御筆親批第一甲第一名及第二第三名又明日未朝

之先

上御謹身殿讀卷官以所讀二名卷進對

御折封中書舍人填其名於黃榜出御奉天殿傳臚

是日

上服皮弁設鹵簿具樂百官朝服慶賀致辭曰天開文運

賢俊登庸行五拜三叩頭禮謹按

國家三大殿謹身殿惟讀進士卷大臣一得入餘日無

由至其地云濬以成化己丑三月十五日叨充讀卷

官是年得狀元張昇第二名丁溥第三名董越

多士充庭伏玉墀摠忠同對 御前題進來試卷臣分讀選出

魁名

帝自批殿內折封 天咫尺素旁填榜甲高低須臾姓字臚傳

出炳炳文星聚在奎

分得玉堂視草送林學士

玉堂天上舊承 恩揮翰時曾代 帝言玉佩瓊琚詞最古

梯丹檢墨猶温香山老去身長健賴水閑居道益尊此日路傍

誰不羨群仙供帳在都門

輓淮安畢義士

江淮都會楚州城過客咸知尚義名晉鄙盡薰陽子德邾人不

愛魯侯盟漆園千歲椿何在蒿里三春草又生多少隣家需舉

火至今聞諱尚吞聲

送陳宗堯侍講署南京院事

南北古今兩玉堂儼如東壁望文昌趨朝暫免通門藉視事榮

省縮院章竹汗消青春晝靜槐龍屯綠午陰涼軟紅塵土長安

道還憶聯鑣傍苑牆

題山水

山色空蒙樹色深人家住傍碧溪潯半江月照天在水五月風  
來秋滿林遯世獨輸高士隱披圖因見昔賢心人間何處有此  
景我欲因之寄越吟

送李立之赴南京太常

奉常自古號清卿君去南京分外清案牘盡懸周典禮官僚並  
列魯諸生函香每月朝鍾阜訪古常時到治城却恨無由追驥  
尾鳳凰臺上聽簫聲

輓劉員外

以謗累謫戍于遼東

遷客年來盡賜歸獨憐君去杳無期春秋斷獄古公必暮夜辭  
金天地知遼鶴空閒留語在燕鳥堪嘆白頭遲百年公論參初

定欲擬招魂托楚詞

送雲南憲使劉伏和致仕

九重恩命許歸田猶是康強未老年忠愍家聲成父志春秋世  
業付兒傳歸鴻影度雲邊樹夕照光回雨後天後會不知還有  
否臨岐分手各凄然

送畫竹屈生

崑山人

東風吹散漕河水旋買吳船載酒行野樹依依連故國雲山點  
點引歸程郢中誰和陽春曲吳下多傳子夜聲白首奉常無恙  
在韞才應已付鄉生

歲丙申六月伏中雨中待朝偶成

二十年前入禁闈朝朝待立着朝儀頭顱種種疑非我世

道悠悠責付誰人到衰年情頓減天將陰雨骨先知可憐歲月  
閒中過年少功名異所期

得家書

老來肌骨怕寒侵無夜家園不上心萬里路行經半載一封書  
到值千金抗顏壁水知無補營老菟裘念已深預報吾兒掃門  
逕乞骸早晚便校簪

張郎中父輓章

學成畢竟未曾施付與佳兒佐 聖時峭拔千尋空宋壁汪洋  
萬頃湛黃陂茶烟尚繞籠中鶴藥裹猶存石上芝聞訃不勝傾  
慕意無由執紼從靈輻

送蔣知州赴潼川州

河中上黨著嘉聲又拂雙旌入蜀行 天子亦知強項令路人  
猶指棄繻生時平險道難還易政善漏天陰也晴莫負平生初  
學志為予成就識賢名

歲巳亥正月十日大祀南郊奉

旨分獻中鎮

聖皇秩祀蒞郊壇分獻今年得霍山奠璧禮行金闕下燔柴烟  
起彩雲間清風颯颯隨神至瑞雪飄飄擁駕還明日慶成應賜  
宴 奉天殿上侍 龍顏

辛丑初度日

前生自是白牛翁再見蒼龍歲舍同身世悠悠還是客顏毛短  
短忽成童兩鬢俯仰期無愧百事修為貴有終此去古稀年不

遠桑榆暮景好收功

哭邢克寬都憲

告

故人老死我何堪  
淚眼汪汪望海南  
宿約別來渾未踐  
暮年歸去與誰談  
一方交友推君獨  
同月陞官並我三  
從死為君志  
宦宦文雖不類却無慚

送人游嶺南

君行是我來時路  
贈別因思舊所游  
綠柳春風巢翡翠  
碧蕪寒雨叫鈞軸  
三冬氣煖人揮扇  
八月天清蜃結樓  
風度祠前拜唐相  
為言早晚便歸休

游歸信筆付敬之

歸來塵上滿  
烏紗倦極無言感  
物華老景幾時猶  
戀祿故園何處此  
看花病來應世少  
諧俗閑裏著書空  
滿家白首楊雄惟  
寂寞剩將心事語  
侯芭

送董尚矩庶子頌

詔朝鮮戊申年

天王出震紀新元  
又值高皇建極年  
詔使遠從天上下  
綸音遙向海東宣  
四方專對詩三百  
兩月經行路五千  
好為大朝全大體  
篇章珍重莫輕傳

送劉景元侍講頌

詔南安

交南本是秦時郡  
再見王封六十年  
聖主紹圖頒鳳詔  
儒臣持節下龍編  
碧參青帶景如畫  
金馬玉堂人是仙  
好為大朝全大體  
篇章珍重莫輕傳

送王儀賓奉



命祀襄陽先王

聖主登基禮百神 宗藩告祀遣親臣  
寶香含霧來天上 玉節明霞照漢濱  
禁纓舊傳金孔雀 宮袍新製繡麒麟  
臨分贈策丁寧語 車蓋亭前問故人

三禽言

得過且過

華山有鳥名寒號 虫方春時鳴曰鳳凰  
不如我至冬毛羽皆落則又鳴曰得過且過  
藥中五靈脂即其糞也

得過且過多福何如少遭禍 紇干山頭凍羽乾  
真信鳳凰不如我得過且過

行不得也哥哥

金兵追宋元祐后 至章貢幾及之時 人有詞曰天晚  
正愁予春山啼鷓鴣 蓋言行不得也

行不得也哥哥 十八灘頭亂石多 東去入閩南去廣  
溪流湍駛嶺嵯峨 行不得也哥哥

不如歸去

元至正十六年 子規啼于居庸

不如歸去中華不是胡 居處江淮赤氣亘天明  
居庸是汝來時路 不如歸去

迴文

夜宿江館有序

歲暮午歸至金陵寓新河客邸鄉友馮元吉誦宋人  
周明老龜山迴文詩命予兩和其韻以夜宿江館為  
題明老詩曰潮隨暗浪雪山傾遠浦漁舟鈎月明橋  
對寺門松逕小檻當泉眼水波清迢迢綠樹連天碧  
藹藹紅霞映日晴遙望四郊雲接海碧波千點數鷗  
輕用意曲折命辭瀏亮信為難及矣但其中潮浪浦  
泉波水等字太多不免重複既曰綠水連天而又有  
雲接海之句則一意而兩出矣當漁舟鈎月之時又  
安得紅霞映日乎

潮生海岸兩崖傾落月江楓映火明橋透白波流水遠屋連紅  
樹帶霜清迢迢漏盡寒更曉片片雲收夜雨晴遙望楚天江渺  
渺芙蓉盡處落鴻輕

菩薩蠻迴文秋思 有序

予幼時嘗讀朱文公劉靜脩文集俱有菩薩蠻迴文  
詞惜其隨句倒讀不免意復不如至尾讀迴為妙已  
曾以村居為題作一闕矣後失其稿閒中復戲作此  
云朱劉二先生詞附此朱詞云晚紅飛盡春寒淺尊  
酒綠陰繁老仙詩句好長恨送年芳又次劉圭父韻  
一闕云暮江寒碧縈長路花塢夕陽斜客愁無勝集  
醒似醉多情劉詞云水圍山影紅圍翠溪近水橋西  
隱人誰與問孤鶴對言無

紗窗碧透橫斜影月光寒處空幃冷香炷細燒檀沉沉正夜闌

更深方困睡倦極生愁思念情感寂寥何處別魂銷

集句

集唐句送魏孔淵御史謫判潼川

鳴王朝來散紫宸鳳樓回首落花頻  
鴻得路爭先翥鸚鵡才高却累身  
直以踈慵招物議不趨權勢正因循  
只因宋王閑唇吻自保曾參不殺人  
謾說簡書惟物役猶將談笑出風塵  
眼前好惡那能定夢裡輸贏總不真  
芳草有情皆礙馬江湖何處不通津  
長空淡淡飛鳥滅客舍青青柳色新  
東澗水流西澗水錦江春似曲江春  
長沙不久留才子莫厭傷多酒入唇

行路難

蜀道難難於上青天蜀道易易於履平地  
行路難不在水不在山只在人情反覆間

悼亡

孟光舉案與眉齊半臂初交又解携  
千里關山千里夢一番風雨一番啼  
每因舊事增新感莫動哀吟易慘悽  
自古佳人多命薄幾多紅粉委黃泥

芙蓉肌骨綠雲鬟傷別傷春更萬端  
去日慚多來日少別時容易見時難  
春蚕到死絲方盡滄海揚塵泪始乾  
無可奈何花落去五更漏徹五更寒

一別音容兩渺茫不堪端坐細思量  
雲收雨散知何處燕語鶯啼亦可傷  
誰愛風流高格調我怜貞白重寒芳  
愁來欲奏相思曲只恐猿聞也斷腸

雲相襲裳花想容幾宵魂夢與君同  
笙調恨譜參商度錦疊空  
床委墜紅千古愁魂銷不得一川秋  
草恨無窮狂風落盡深紅  
色一片西飛一片東  
腸斷春風爲玉簫我心懸旆正遙遙  
一痕心事難消遣萬片香  
魂不可招慘慘悽悽仍滴滴霏霏拂  
拂又迢迢砌成此恨無重  
數縱得春風亦不消

詩餘

風入松

王堂即事

九重天上五雲深高處是詞林西岷東壁圖書府文昌近  
帝座天心身世瞻依堯日筆端揮灑商霖 槐龍日煇布青陰  
宮漏晝沉沉絲綸草罷渾無事黃封酒花底頻斟但得身常步

玉不須腰有重金

玉堂清切倚璇霄延閣鬱岿堯清泠風露非人世祥雲擁瑞藹  
飄飄村館廣儲杞梓玉峯群萃瓊瑤 蓬萊深淺不通潮無福  
也難消書生應有神仙分今生也自在逍遙飽聽鈞天樂奏不  
聞凡世塵囂

生查子

秋思

雲散嶺頭光葉落山形瘦目斷遙空鴈不來正是悲秋候  
雨  
點水痕圓風蹙波紋皺顧影徘徊落小池頓覺人非舊

應天長

春思

午窓閑展湘紋簟春夢醒來眉乍斂珠簾捲重門掩情事不堪  
重點  
晚山青似染望眼年年頻減惆悵流光荏苒芳心無

半點

踏莎行 江村

鷺破青林鳧分碧藻江村景致天然好一塵不到萬緣空人生  
只合閑中老 古樹巢雲落花繡草四山絃管啼幽鳥醉來白  
眼望青天人間別有乾坤小

瓊臺會稿卷之十二終

南昌府學生員甘一驥校正

15/10  
16

生員廿

三ノ